

YA'AT AYUUK JA JESUCRISTO TYUKNĪJA'WĪ KUMAA'YJØTPY JA JUAN

Ku ja Jesucristo ttuk'ijxy ja
Juan sa ja naxwii'ñit yjatt

1 Ya'at idø'on tiy'ajtin midi
ja Dios Teety tyukmadoow
ja Jesucristo, jøts ja pyadumbi
pyabøjkpi ttuk'ext ttuknijawit
sa nøjkx yjatt kyubatt tsojk ya
naxwiiñ. Nay øts ja tiy'ajtin tuki'iyi
tø xuk'ixy tø xuknijawi sa tu'uk
y'ankilis tø xukmigajpxy. ²Xjats øts
njaadyangijxy tuki'iyi pøni ti jaty ja
Dios Teety møøt ja nwindson'ajtim
Jesucristo tø xuk'ixy xukmadøy.

³Tya'ø'y'ajtidip ja Dios
kyunuu'kxin pøn ya'at nøky t'ejxp
jøts tpadu'unt, nayide'ents ja' pøn
tmadoop, pø wingompxi dø'on jøts
jade'en yjatt sam yø nøky wya'añ.

Ku ja Juan tnija'ayiyii'ñ pøn
jaty ja Dios tjanchja'widip
ja niwixujkpi kajp

⁴Øts Juan, øts meets ya'at
nøky ndanija'ayip pøn ja Dios
tjanchja'widip, ja niwixujkpi
kajp midi jam Asia y'etjotp. Paat
meets ja kunuu'kxin øy'ajtin
midi ja Dios yajkpy, ja' midi

xemikøjxp jujky'ajtp, nayide'ents
mgunuu'kxidit ja niwixujkpi ja'win
midi møøt y'ity ja Dios Teety.

⁵Wan mgunuu'kxyidi nayide'en
ja nwindson'ajtim Jesucristo pøn
tnanky'ejxip ja tiy'ajtin, jøts pøn
myijawyeen tø yjukpyøjkøjmi jap
oo'kpi jutjøtpy. Ja'ats nayide'en
tnigutujk'ajtp niduki'iyi ja
møj windsøndøjkti ya naxwiiñ.
Nayide'en ja Cristo xpa'ayø'øyimp
sa tø xyikpøkwyaaajchim ku tø
wyidsuñ wyidaxy adøm nbøkyøjxp.

⁶Tøts ja xpiktaajkyim jade'en
øyjaa'y møjaa'y, jøts nbadu'unindit
ja Dios Teety yja' midi tyety'ajt
nwindson'ajtim. iWan tja'myejchim
xemikøjxp ja Dios y'ø'y'ajtin
myøk'ajtin! Jade'en idø'on ja yjatt.

⁷iMeets, uk'ejxti ukmadowdi,
jade'en idø'on ja Cristo mye'ent
yootsjøtpy! Jøts niduki'iyi
n'ejxint, nayide'en ja'adi pøn ja
nwindson'ajtim yik'ayo'ombajti
kruskøjxp; janch ya'axtip janch
ji'idyip ja naxwii'ñit jaa'y ku jade'en
t'ejxtit. Jade'en idø'on ja yjatt.

⁸Yide'en ja Dios Teety wya'añ
pøn ja myøk'ajtin møj, jøts pøn

xemikøjxp jujky'ajtp: “Øts idø'en ja tso'ondaajkin jøts øts nayide'en ja jøpkøjxin'ajtin nyajkpy.”

Ku ja Juan t'ijxy ja Cristo

⁹Øts Juan, meets nmigu'uk'ajtpy ku ixyam nayide'en ngu'ayo'ombaajtindi ja nwindson'ajtimgøjxpit, paty adøm xmø'øyim ja øy'ajtin ja tudā'aky'ajtin jøts ja xyik'ejtint mā ja kyutujk xanatanaa'yimp. Jam øts wyinaty ndsumchøøni mā txøow'aty Patmos jam mejy kyujk'am, ja'agøjxp ku øts ja Dios kyajpxy ngajpxwa'kxi jøts ja Jesucristo yja' nnigajpxi.

¹⁰Domingi xøow wyinaty ku øts ja Espiritu Santo adsu'jky xatøki, jøts kumaa'yjøtpy møk øts xjiguyaaxi ejxim tu'uk ja puxujx, ¹¹yide'en ja wya'añ:

—Øts idø'en nyiktso'ondaajk tuki'iyi jøts nay øts nyikjøpkøxp. Midi jaty m'ejxp mnijawip, tanijayi pøn ja Dios ja'ajtip mā niwixujkpi kajp jam Asia y'etjotp. Ja' xyøow ja kajp: Efeso, Esmirna, Pérgamo, Tiatira, Sardis, Filadelfia jøts Laodicea.

¹²Xjats n'ejxjimbijty pøn øts xmigajpxp, jøts n'ejxpaaty wixujk ja kandleeri midi tum oori. ¹³Jam wixujkpi kandleeri kujk'am n'ijxy tu'uk ja jaa'y jade'en sam adømin, jade'en ja wyet tyek'ok'am paat kyida'aky. Tum oori ja chum kyaxi'iky midi ja'tp kyachwiñ.

¹⁴Ja kyubajk, janch amuum poop ja wyaay kyaxi'iky ejxim ja poop pixyin, ejxim tsap'øøpkysin, jøts ja wyeen jade'en kyaxi'iky ejxim jønyowin. ¹⁵Ja tyeky, jade'en

kyaxi'iky janch amuum tsamamp ejxim ja pujx n'uk'ejxint midi janch tøø'kxp, midi øyip ornijøtpy; ku ja kyajpxy, møk idø'en nmadoo'wint, jade'en ejxim ja møj nøø y'hichin.

¹⁶Jam y'aga'ngyøjøm tmatch'ity wixujk ja maadsa', jøts y'aawjøtpy pyidsimy tu'uk ja yønchujx midi janch jøpxuul'n jøts adsow jøøjp. Jade'en kyaxi'iky ja wyeen ja y'aaw ejxim ja xøow møk y'añin.

¹⁷Ku øts n'ijxy jade'en, winets øts ojts øøky nayjawiyyi nnaxkida'aky ja' tyekyjøøm, jøts øts ojts y'aga'ngyø' xanixajy jøts ø xnimaay:

—Kidi mdsø'øgi; øts idø'en, tø nyiktso'onda'aky tuki'iyi nayide'en sa nyikjøpkøxt. ¹⁸Jujky'ajtp øts idø'en øy tø nja'øøky, xemikøjxp njujky'aty jøts øts ja møk'ajtin njagyeyjy, jøts øts nyikjujkyøkt pøni pøn tø y'ookti tyigøydi.

¹⁹Jaadyangøx tuki'iyi midi ixyam m'ijxpy, midi ixyam mnija'wip, jøts midi jatwamp. ²⁰Jade'en idø'en ja twandijy midi tø x'ixy, ja wixujkpi maadsa' n'aga'ngyøjøm jøts ja wixujkpi kandleeri nayide'en: ja wixujkpi maadsa', yø' twandejp pøn ø ngugajpxy'ajtpy mā øts ja njanchja'wibitøjk jamdi mā wixujkpi kajp jam, jøts ja kandleeri ja janchja'wibitøjk ja'adi, pøn jam'ajttip.

Ya'at ayuujk ja nwindson'ajtim tyaniguejxy ja yjaa'y mā ja wixujkpi kajp: Yide'en jawyeen yiktanija'ayiyi'iñ ja Efesit jaa'y

2 Nijayi øts ngugajpxy midi jam Efeso sa øts ixyam nnigajpxy: “Yide'en ja wya'añ pøn jam y'aga'ngyøjøm

tmach'ejtp ja wixujkpi maadsa' jøts pøn jam tanaapy wixujkpi kandeleeeri kujk'am: ²Wa'ats ø nnijawi tuki'iyi pøni ti mdumpy; nnija'wip ø tuki'iyi sa møk mduñ øts køjxp, jøts sa mduda'aky'aty, nayide'en ø nnijawi ku xkagupiky pøn ka'øyjaa'y'ajttip. Tøxi x'ixy tu'uk jaty pøn nugo nadyejidip øts ngudanaabyitøjkti, ka'ap ja tyiy'ajtin wyingaxi'iky, nugo ja wyindaayidi. ³Øy møk ja maa'kxujkin tø xjagyepy ku tø xpaduujni øts nja', jøts ku tø xku'ayo'ombaadi øts køjxp, jøts ka'ap ja jotkøjxin tø xmøøt'aty. ⁴Tu'uk øts nga'øyjawi mets ja mjaa'y'ajtin: ku mets ka' nayide'en x'uktsojkní sam xyiktso'ondaajky. ⁵Paty ø nwa'añ, ja'myats pøni ma tø mduu'digø, jøts xyiktigatst ja mwinmaa'ñ, jøts nayide'en xu'unt sam jawyeen tø xuñin. Pøni ka' xuñ jade'en, nbøjknip øts yø kandeleeeri midí mmøøt'ajtpy. ⁶Ots idøøn yjade'eni, mjagyeyjpy nayide'en ja øy'ajtin ku nayide'en xkatsøky ja nicolaítas y'ixpøjkin sam ø ngatsøkyin. ⁷Madowdi yikxon sam ja Espíritu Santo tmigajpxy pøn ja Dios ja'ajtip, yide'en ja wya'añ: Pøni pøn tmimajadakp ja miku' yja', ja'ats nmo'op ja øy'ajtin xemikøjxp ma Dios y'ity."

**Yide'en ja Esmirnit jaa'y
yiktanija'ayiyii'ñ ja ayuujk**

⁸Nijayi nayide'en øts ngugajpxy pøn jam ejtp ma øts njanchja'wibitøjk jam Esmirna kajpjotp: "Yide'en ja wya'añ pøn tuki'iyi tø tyiktso'onda'aky jøts pøn nayide'en tyikøxp, ja' pøn

o'jk jøts yjukpyøjkojmi oo'kpi y'agujkpy: ⁹Nnija'wip ø tuki'iyi pøni ti mdumpy; pøni sa m'ayøy mwinmay, øy yø meen kyidyimy'ity, tø ja Dios mdsuj'ijxyi mdsujawiyi ja' wyingujkp. Nnija'wip øts ku mjemigajpxyi mdemigajpxyi winaagin pøn nugo nadyejip israelit jaa'y, yø' yide'en nugo tjayikmajada'akwajnidip ja miku' yja', pø ka'axi Dios ja tja'aji. ¹⁰Kidi mdsø'øgidi pøni sa mjattit mgubattit; yø miku' mnankchumwajniyidip jøts nidu'uk nidu'uk myikjot'ejxtit, jøts xmajtstu'uttit ja Dios yja'; øy yø mjayik'etidit majk xøøw puxøjkjøtpy, tu'ugyi ja mwinmaa'ñ xyik'ettit o mjadyimy'ookti, øts mee nmo'op ja jujky'ajtin midí xemikøjxp. ¹¹Madowdi yikxon sa yø Espíritu Santo tnigajpxy pøn ja Dios ja'ajtip, yide'en ja wya'añ: Pøni pøn tmimajadakp ja miku' yja', ka'ap ja tpaatt t'ext ja ayodaajk. Ka'ap ja y'anmija'win sa yjatt."

**Yide'en ja Pérgamit jaa'y
yiktanija'ayiyii'ñ ja ayuujk**

¹²Nijayi nayide'en øts ngugajpxy pøn jam ejtp ma øts njanchja'wibitøjk jam Pérgamo kajpjotp: "Yide'en ja wya'añ pøn tmøøt'ajtp ja yøñchujx yjøpxu'uñ adsow jøøjp: ¹³Nnija'wip ø tuki'iyi pøni ti mdumpy jøts ku jam ja miku' møk y'ane'emy ma mdsøøni, ka' xja'dyigø ja mjanchja'win øy øts njanchja'wibitøjk jyadyimy'ø'jky pøn txøøw'ajt Antipas, pøn øy tsuj xpaduujni øts n'ayuujk. ¹⁴Ya'at øts n'øy'ijxpy nga'øy'ijxpy pøni ti mdumpy: jam meets winaagin jam

Pérgamo, pøn tkamajststu'utwamp sam ja Balaam ja y'ixpøjkin jekyip tyik'ity, ja'ats ojts t'agajpxi ja Balac jøts ttukmado'tot ja israelit jaa'y sa tyundigø'odyit. Ojts ttukmadø y jøts tjøø'kxtit midi tø wyinaty yiktamiyøxy ja maxandsaa, jøts nayide'en o sa pøn ñamyøøt'atyyidit. ¹⁵Nayide'en meets jam winaagin pøn tkamajststu'utwamp ja nicolaítas y'ixpøjkin midi øts ngatsøjkpy. ¹⁶Paty ø nwa'lañ, jøts tyiktigatstít ja wyinmaa'ñ; pøni ka'ats, tsojks ø nnøjkxt jøts ndatseptu'unt ja nyøñchujx midi pidsømp n'aawjøtpy. ¹⁷Madowdi yikxon sa yø Espíritu Santo tñigajpxy pøn ja Dios ja'ajtip: Pøni pøn tmimajadakp ja miku' yja', ja'ats nmo'op ja jii'kxy midi yiktejp maná midi yu'uch ejtp; nayide'ents ø nmo'ot ja mutsk tsaa'u'nk midi poop, japts tu'uk ja xøøw kyøxja'ayi midi jemy jøts midi ka' yik'ixy yiknijawí, ja'ayi tu'uk tñija'wíp pøn ja yikmøøpy.”

**Yide'en ja Tiatirit jaa'y
yiktanija'ayiyii'ñ ja ayuujk**

¹⁸Nijayi nayide'en øts ngugajpxy midi jam ejtp ma øts njanchja'wibitøjk jam Tiatira kajpjoth: “Yide'en ja Dios U'nk wya'lañ pøn ja wyeen jade'en kaxø'kp ejxim ja jøn'ayowin, jøts ja tyeky ejxim tu'uk ja pujx midi janch tøø'kxp tsamamp: ¹⁹Nnija'wíp øts tuki'iyi pøni ti mdumpy, sa mmigu'uk xpa'ayø, sa ja Dios kyajpxy xpaduujni, sa xpudøki pøn ti ka'ejttip jade'en sa mduda'akyjaa'y'aty. Tø øts nja' xyikmiweni xyikaja'aji

jawaani øy yam, ka'ap jade'en sam jawyeen tø xyiktso'onda'aky. ²⁰Ya'at ø n'ixpy nga'øyja'wíp mets køjxp: ku xkupiky ja ka'ødyø'øxy Jezabel, pøn ñadyijyi ja Dios kyajpxy tkajpxip, nugots ja y'ixpøjkin ja ttawin'iiñ øts ja njanchja'wibitøjk kuk idø'on øy o sa pøn ñamyøøt'atyyit jøts ku tjøø'kxtit midi tø yiktamiyøxy ja maxandsaa. ²¹Tøts øts nayide'en njanøjmi jøts tyiktigatstít ja wyinmaa'ñ sam pyaat'atyi, ka'ats ja tpadunwa'lañ: ka' tñajststu'utwa'lañ ja kya'øy'ajtin. ²²Øts ja nwandu'ump sa ja yuu ja pa'am pyaadiyit, nayide'en niduki'iyi pyaatkøxyit ja ayo'on pøn jaty møøt tø tyundigøy. ²³Nwandu'umpts øts nayide'en ja y'u'nk ja y'unaj'k pøn ka'ødyø'øxy'ajttip. Jade'en idø'on t'ejxtit tñijawidit niduki'iyi øts njanchja'wibitøjk sam øts wa'ats n'ejxkapy sam pøn tu'uk jadu'uk wyinmaa'ñ tjagyeyjy y'am yjotp. Nidu'uk nidu'uk meets ndiidyu'undit pøni sa jaty pøn tø y'adø'øtsti. ²⁴Ka'ap øts sa nwa'andijy ku ja ka'ødyø'øxy yja' tø xkabaduujni ku ja miku' kyootswinmaa'ñ tø xkayikmajadaajkidi. ²⁵Padun'etti xemikøjxp ja winmaa'ñ midi myiktundip kunim ø nme'ent. ²⁶Pøni pøn tmimajadakp ja miku' yja' jøts nayide'en ttu'unt sam ø ndsøkyin, ja'ats nmo'op ja møk'ajtin jøts tñiwindsøn'att niduki'iyi ja naxwii'ñit jaa'y. ²⁷Yø'øbi møk'ajtin midi øts ja Dios Teety tø xmø'øy, nay yø'øts mdaba'ejxtip mdabayø'ødyip ja naxwii'ñit jaa'y. ²⁸Nayide'ents meets nmo'ot

ja øy'ajtin jøts meets møøt n'ett xemikøjxp. ²⁹Madowdi yikxon põni sa jaty ja Espíritu Santo tnøjmi ja janchja'wibitøjk pøn ejtip jam ma niwixujkpi kajp."

**Yide'en ja Sardisit jaa'y
yiktaniija'ayiyii'n ja ayuujk**

3 Nijayi nayide'en øts ngugajpxy pøn jam ejtp ma øts njanchja'wibitøjk jam Sardis kajpjotp: "Yide'en ja wya'añ ja' pøn tkajxp ja niwixujkpi kugajpxy jøts midi tpøkjø'kp ja wixujkpi maadsa': Wa'ats ø nnijawi põni ti mdumpy. Ots myiktijy myikwa'añ ku øy tsuj mduñ, nnija'wip øts ku ka' mduñ. ²Jawidi, nay'ejx'etidi, jøts ka' jadi'iñi mwindigø'odyit; n'ijxpy nnija'wip øts midi mdumpy ku ka'ap tyiy'aty Dios wyindump. ³Ja'myatsti ja øy'ayuujk ja øgyajpxy midi tø xadowdi tø xukpøkti; nay yø' mbadu'undip jøts ja mwinnmaa'n xyiktigatstit. Ku xkatu'unt sam nwa'añ, winets ø nme'ent adsu'jky sam ja maa'tspi myiñ, nika'ap ja xnijawit põni juuni nme'ent ejxpi payø'øbyi. ⁴O meets yø'øbi winmaa'n tø xjababiky, jamts winaagin pøn øy wa'ats jaa'y'ajttip, ja'ats ø møøt n'lity xemikøjxp sam pyaat'aty. ⁵Pøni pøn tmimajadakp ja miku' yja', ja'ats ja wa'ats'ajtin tsuj'ajtin tpaatp, ka'ats øts ja xyøøw nyiktigøjyi midi tø yikja'ay jap nøkyjøtpy ma jap y'lity ja jaa'y xyøøw pøn jujky'ajttip xemikøjxp. Ngajpxkaxø'jkijxpy øts ja jam Dios Teety wyindump jøts jam y'ankilis wyindump. ⁶Madowdi yikxon põni sa jaty ja Espíritu Santo tnøjmi ja janchja'wibitøjk pøn ejtip jam ma niwixujkpi kajp."

**Yide'en ja Filadelfiit jaa'y
yiktaniija'ayiyii'n ja ayuujk**

⁷Nijayi nayide'en øts ngugajpxy pøn ejtp jam ma øts njanchja'wibitøjk jam Filadelfia kajpjotp: "Yide'en ja wya'añ ja' pøn øy'ajtp wa'ats'ajtp, ja janchpi ja tiiby, nayide'en ja møk'ajtin tjagyepy jade'en ejxim ja rey David y'lijty yikutuky: Ku ja tuu' nyik'awa'ach ka' pøn mibaat tyik'awa'atst. ⁸Nnija'wip øts tuki'iyi põni ti mdumpy. Tøts ja mduu' nyik'awa'ach midi ka' mibaat pøn tyik'adukt; øy ja møk'ajtin waani tø xjagyepy tøts ja n'ayuujk xmøjpkitaajki, ka'ap ø tø xkagupiky. ⁹Jamts winaagin pøn nugo nadyejip israelit jaa'y jøts øts nja' ñadyiyi xyiktuujni. Ka' tyiy'ajtin, taay ja pyiktakpy ku ja miku' yja' tyiktuujni, nay øts ndukupøkp jøts mwindsø'øgiyit, m'ejxkapiyit ku mee ndsøky. ¹⁰Tø øts n'ayuujk xpaduujni ku øy tuda'aky mjaa'y'atti sa dø'on nda'ane'emy, nayide'ents nbøkji'kpy n'ejxji'kpyts meets m'øy'ajtin. Jats yik'ext ku ja møk ayo'on ku ja tiidyu'unin ñaxkida'akt jøts ja payø'øyin tyunit pøn jaty tø y'øy'atti ya naaxwiñ. ¹¹Me'emp øts tsojk. Yik'etim yø mwinnmaa'n jade'en sa tø xpaduñ, ka' pøn mibaat ja Dios yja' mbøjkxiyit. ¹²Pøni pøn tmimajadakp ja miku' yja', ja'ats møjtøkip ma ja Dios, nijuuni ja tkamajstsu'uttit; nayide'ents meets ja Dios xyøøw ndawinja'att jøts ja kyajp midi yiktejp jemy Jerusalen, yø' tsoomp jam Dios wyingukp; ndawinja'apts meets njemxyøøw

nayide'en. ¹³Madowdi yikxon sa yø Espiritu Santo tnøjmi pøn ja Dios ja'ajtíp ma niwixujkpi kajp.”

**Yide'en ja Laodiceit jaa'y
yiktanija'ayiyii'n ja ayuujk**

¹⁴Nijayi nayide'en øts ngugajpxy pøn ejtp jam ma øts njanchja'wibitøjk jam Laodicea kajpjotp; “Yide'en ja wya'añ ja' pøn tyakp ja tiy'ajtin, pøn tyiktso'ondakøjx tuki'iyi:

¹⁵Nnija'wip øts tuki'iyi pøni ti mdumpy, ku nugo ejxingøjxp øts nja' xpaduujni, ka'ap amumjoojt. iØy'ajtp ku tu'ugyi xpadu'undit, pøni ka'ats, majtstu'utkts øts!

¹⁶Kumi ka' xnijawidi pøni midi ndunwandip, nugo mee møk xyikjotkixy, ndyimyajtstu'utwampy mee ne'egi. ¹⁷Nømp mee mw'a'añ jøts ku meets jotkujk xyiknaxy, ku niti mgadigø'oxyi; ka'ats mnayjawiyi ku niti mga'ljtxyi, ku nugo wimbeets kugoots xyiknaxy.

¹⁸Yide'ents idø'on ja kajpxwejin nmøø'y, jøts ø x'amido'ot xpøktso'ot midi øts nmøøt'ajtpy, jade'ents xpaatt ja øy'ajtin, ja wa'ats'ajtin jøts ja ja'gyujkin. ¹⁹Jade'engøjxp meets ixyam møk n'ane'emy ku mee nba'ayø. Møk xwindanidit jade'en sam øts xmijotimbettit.

²⁰Ejx ku meets ya ngugajpxi y'ity ya mdøk'agi'y; pøni pøn øts n'ayuujk xmadojip jøts øts nja' xkupøjkít, ejtpts øts ja møøt n'ett.

²¹Pøni pøn tmimajadaakp ja miku' yja', møøts øts ja n'ett, jøts øts ja kutujk nmo'ot nayide'en sam øts ja Dios Teety tø xmøø'y ku øts ja miku' yja' nmimajadaajki, møøts øts ja Dios Teety n'ity. ²²Madowdi

yikxon sa ja Espiritu Santo tnøjmi ja janchja'wibitøjk ma jam ja niwixujkpi kajp.”

**Sa ja Dios Teety yikajxa'aky
jap tsajpjøtpy**

4 Ku tø jade'en y'ukjaty jøts n'ejxpaaty ja tsajp y'awa'adsi ejxim ja tøjkaawin; jøts ja ayuujk nmadøøy møk sam ja trompeta'an midi øts jawyeen xmigajpx, jøts øts xnimaay:

—Pat yam, jøts nnanky'ejxit tuki'iyi sa yjatwa'añ kyubatwa'añ.

²Tø øts wyinaty ja Espiritu Santo xatøki, kumaal'yjøtpy n'ixy jade'en tu'uk ja tsinaabyajt jap tsajpjøtpy ejxim ja møj windsøn yja'ajin, jamts chøøni tu'uk ja jaa'y ³midi jade'en kaxø'kp ejxim ja tsaa midi janch tøø'kxp tsamamp, sa ja jaspe tsaa, uk ja cornalina tsaa; jamts i'jch tø ñawyidityi, jade'en tyi'kxy sam ja esmeralda tsaa. ⁴Ma ja møj tsinaabyajt jam, jamts ø n'ixy ee'pxmaktaxk ja tsinaabyajt nawidity, jamts ja møjaa'dyøjk ni'ee'pxmaktaxk chøønidí, amuum poop ja wyetti jøts tkujup'atti ja koroni janch amuum oori. ⁵Møk ja anaaw ja widsujk pyidi'iky ma møj tsinaabyajt jam; nay jam wyingujk wixujk ja jøøn tyøøbyiky, ja niwixujkpi ja'win idø'on ja' midi ja Dios Teety møøt y'ity. ⁶Nay jam møj tsinaabyajt wyindump kyaxi'iky tu'uk ja mejy, janch wa'ats janch tøø'kxp ejxim keega'an.

Jøts jam nayide'en ja møj tsinaabyajt ñawidityi namaktaxk ja jiyujk midi may ja wyeen tmøøt'ajttip, kaxø'kp yjøxki'py kaxø'kp wyindujy. ⁷Ja myidu'ukpi

jyujk, jade'en ja kyaxi'iky ejxim
tu'uk ja kaajin: ja myimajtskpi
jyujk, jade'en ja kyaxi'iky ejxim
ja tsakaajin; ja myidigøøkpi
jyujk, jade'en ja wyeen ja y'aaw
kyaxi'iky ejxim ja jaal'in; jøts ja
myimaktaxkpi jyujk kyaxi'iky
ejxim ja weejts kyakwidityin.
⁸Tu'uk jaty ja jyujk tudujk ja kyank
tmøøt'aty, may ja wyeen nayide'en
kyaxi'iky yjøkxi'py jøts wyinduujy;
xinaxy tsunaxy ja Dios tja'myatsti
jøts nøm'etti:

Janch øy janch wa'ats me Dios
Teety,

Mets tu'ugyi ja møk'ajtin
mjagyeypy,

jøts xemikøjxp mjujky'aty.

⁹Xjats ku ja jade'en ja
nimaktaxkpi jyujk ttundi, ku
ja jade'en tja'myatsti ja' midi
xemikøjxp ejtp, midi tsinaapy
møj tsinaabyajt køjxp, ¹⁰xjats ja
ni'ee'pxmaktaxkpi møjaa'dyøjk jaty
ñagyuxendya'agyidi, jøts ja kyoroni
tkiidyakti jam møj tsinaabyajt
wyingujkp jøts wya'andi:

¹¹Mets Dios Teety, mets

amuum møj sam

pyaat'aty myikwindsø'ogit

myikwinjawit.

Pø tøxi xyiktso'ondakijxy tuki'iyi
mdsojkingøjxp jøts jade'en y'ett.

Ja nøky jøts ja Borreek U'nk

5 Xjats n'ijxy ja' pøn jam
tsinaapy møj tsinaadyajkøjxp
ku jam tmach'ity y'aga'ngyøjø'øm
tu'uk ja nøky abidity midi ja'ay
jøtpy jøts ñikøjxp, wixujk weents
ja cha'ayi, jøts ja jade'en y'adukyi.
²Winets ø n'ijxy tu'uk ja møj ankilis
jøts ja møk t'amidøy:

—iPøn paat'ajtip tyik'awa'atst yø
nøky, jøts t'agøøtstu'tt yø seeyi?

³Nipøn ja tkanadyaja'ejxiyi
tyik'awa'atst, ni tsajpjøtpy ni
naxwiin ni naxpatkipy, nipøn
ja tkawin'ejxwa'lañ. ⁴Xjats øts
nyaaxni njiin, nipøn kyayikpaaty
pøn tyik'awa'atst ja nøky jøts
yik'ext yiknijawit, nipøn ja
tka'ukwin'ejxwani. ⁵Xjats øts
xnimaay ja møjaa'y tu'uk:

—Kidi mjanchya'axy, jaa tu'uk pøn
tnigubajk'ajtp ja Judajit jaa'y, jøts
pøn ja rey David y'apip, yø'øts tø
myajada'aky jøts t'agøøtstu'tt ja
wixujkpi seeyi jøts tyik'awa'atst ja
nøky.

⁶Xjats ø n'ijxy tu'uk ja Borreek
U'nk tyani ma møj tsinaabyajt jam,
ja' kyujk'am ma ja møjaa'dyøjkti,
jøts ma ja nimaktaxkpi jyujk jam.
Jamts ja yik'ijxy kyaxi'iky sam
ti jyaty kyubety y'ayo'ombaaty.
Wixujk ja wyaj tmøøt'aty jøts wixujk
ja wyeen; jade'en yø tijy yø wixujkpi
ween sam ja niwixujkpi ja'win midi
ja Dios tø tkexy ya naxwiin. ⁷Xjats ja
Borreek U'nk tniinijxy pøn wyinaty
tsinaapy møj tsinaabyajtkøjxp
jøts tøjki ja nøky midi wyinaty
myøøt'ajtpy y'aga'ngyøjø'øm.

⁸Ku ja tpijky ja nøky, winets
ja nimaktaxkpi jyujk jøts ja
ni'ee'pxmaktaxkpi møjaa'dyøjk
ñagyuxendyajkidi jam Borreek
U'nk wyingujkp. Nidu'uk nidu'uk ja
møjaa'dyøjk tmøøt'atti ja kow midi
yiktejp arpi, jøts nayide'en tkondi ja
poom tøøy'hiñ, tum oori ja', jade'en
yø poom tijy sam ja Dios'ajot'ajtin
midi kyajpxtip pøn jaty ja Dios Teety
ja'ajtip. ⁹Jamts yide'en ja jemy iij
tyikwandøø:

Mets idø'on mbaat'ajtip yø nøky
 jøts yø seeyi xkøøtst;
 ja pø tøts xniwanguixy
 niduki'iyi ja jaa'y, o midi kajp
 o midi ayuujk,
 jade'engøjxp ku tø
 m'ayo'ombaaty ma tø mdsuñ
 tø mdaxy.

¹⁰ Tø øøts xyikmøjtøki jøts øø
 nbadu'unt sam ja Dios tsøkyin,
 jøts øø nwindson'att ja
 naxwii'nit.

¹¹ Winets ø n'ixy ja ankilis
 namay tni'awidetti ma ja møj
 tsinaadyaajk jam, nay jamts
 wyinaty ja nimaktaxkpi jiyujk jøts
 ja møjaa'dyøjkti, ¹² møk y'øøwdi
 tum jade'en jøts wya'andi:

Janch øy ja Borreek U'nk midi
 tø y'ayo'ombaaty,
 paat'ajtip jøts tpaatt ja møk'ajtin
 ja øy'ajtin, ja wejñ ja kajin.
 Paat'ajtip yikwinjawit
 yikwindsø'ogit.

¹³ Xjats nmadøy nayide'en ku
 y'øøwdi niduki'iyi ja naxwii'nit
 jaa'y jade'en tsajpjøtpy naxkijxy,
 jøts jade'en øy ja ma jøts wya'andi:

Janch øy janch møj ja Borreek
 U'nk,
 paat'ajtip yikwinjawit
 yikwindsø'ogit xemikøjxp.

¹⁴ Xjats nayide'en ja nimaktaxkpi
 jiyujk wyandøø:

—iOts jade'en!

Xjats ja ñi'ee'pxmaktaxkpi
 møjaa'dyøjk niduki'iyi
 ñagyuxendyajkøxidi jøts
 twindsø'ogidi ja Dios.

Ja wixujkpi seeyi

6 Jøts ø n'ijxy ja Borreek
 U'nk ku ja myidu'ukpi seeyi

t'ago'otstu'uty ja wixujkpi seeyi,
 jøts nmadøoy tu'uk ja ñimaktaxkpi
 jiyujk ku møk yjanchwina'añ
 jade'en sam ja anaawin, jøts yide'en
 wya'añ:

—iMen x'uk'ixy!

² Jøts ø n'ijxy tu'uk ja poop
 kawaay, pønts ja tyatsinaajyip,
 arki ja tu'uk pyagajpy. Tu'uk ja
 koroni yikmøoy ku tø myajada'aky
 ma tsep, tyun'adø'øtswampy jøts
 cho'ongojmi.

³ Xjats ja Borreek U'nk ja
 myimajtskpi seeyi t'ago'øtstu'uty,
 jøts ja myimajtskpi jiyujk wya'añ:

—iMen x'uk'ixy!

⁴ Jøts jadu'uk ja kawaay
 kyaxi'iky, tsajpts ja' ñine'kx. Pøn
 ja ttatsinaapy ja'ats yikmøoy tu'uk
 ja amøjtsujxyñ jøts yiktanipijky
 jøts ja cheptu'unt, jøts niduki'iyi
 ja naxwii'nit jaa'y ñañibidøkøxiyit,
 xem ja yam ñanky'oogiyidit, ka'ap
 ja jotkujk'ajtin ma.

⁵ Xjats ja Borreek U'nk ja
 myidigøokpi seeyi t'ago'øtstu'uty,
 jøts ja myidigøokpi jiyujk wya'añ:

—iMen x'uk'ixy!

Winets ø n'ixy tu'uk ja yøk
 kawaay, pøn ja ttatsinaapy, tati'i'yin
 ja wyejts'ijtpy kyøjø'øm. ⁶ Jats ja
 ayuujk nmadøoy jam ñimaktaxkpi
 jiyujk kyujk'am, ku wya'añ yide'en:
 —Wimbatp nøjx ja trigo jøts
 nayide'en ja cebada midi amuum
 tump; aceite jøts ja vino ka'
 wyimbatt.

⁷ Xjats ja Borreek U'nk ja
 myimaktaxkpi seeyi t'ago'øtstu'uty,
 jøts ja myimaktaxkpi jiyujk wya'añ:
 —iMen x'uk'ixy!

⁸ Winets ø n'ixy tu'uk ja pu'ts
 kawaay, pøn ja ttatsinaapy

ja'ats yiktanipøjk jøts ja yikjaa'y'lookt. Ix'oojk ja pyamiñi pøn tkudanaapy ja ayodaajk. Xjats ja yiktaguwa'anøø jøts tyik'ayo'ombaatt jawaani kagujkwa'kxy ja naxwii'ñit jaa'y, jade'en'ampyts ja tyik'lookt ku tkaxt ja tsep, ja yuu, ja pa'am jøts ja awa'an jiyujk.

⁹Jats ja Borreek U'nk ja myimagoxkpi seeyi t'agø'tstuujty, jøts n'ijxy altajr patki'py may ja anmija'windi pøn tø tku'oogidi ja Dios yja'. ¹⁰Ja'ats kajptip møk, jøts ja Dios yiknimaay:

—Janch øy janch wa'ats me Dios Teety, jøts xuñ ja tiy'ajtin. Juuninim xpayø'ty xiidyu'unt ja jaa'y pøn øøts tø xyik'øøky ya naxwiiñ.

¹¹Jøts yikmøøy ja poop wet jøts yiknimaadyi jøts pyoo'kxtit y'lawejxtitnim øy winø'ønin. Wan t'uknamyukyidi ja migu'uktøjk pøn tku'ookwajnipnim ja Cristo yja'.

¹²Xjats ku ja Borreek U'nk t'agø'tstuujty ja myidudujkpi seeyi, xjats ja tsaachmøk uix ñajxy. Jøts ja xøøw amuum yøk yjajty ejxim tu'uk ja yøk wetin, jøts ja po' tsajpts kyaxi'jky ejxim ja wa'ats tsajpts ni'jpyin, ¹³jøts ja maadsa' kyay' naxkijxy, jade'en ejxim ja tsaachmøk poj tyikajtskø'øy ja ujts tøøm. ¹⁴Jøts ja tsajp jadi'iñi ñawya'kxkøjxniyi, jade'en ja yjajtni ejxim ja nøky jadi'iñi y'abidejtmuky, jøts ja kojpk jøts ja naajx midi mejy kyujk'am tuki'iyi tyigatskøjxni ma ja y'uk'ijty. ¹⁵Xjats ja jaa'y kyakwidejtnidi, t'ixaabyi naxwa'knidi ja nayu'utstaajk, tyøjkiñøø tsaaj jutjøtpy tsaaj ankjøtpy øy ma. Jajttip ja

windsøndøjk ja kumeendyøjk, ja møj ja mutsk. Jajttip ja soldadi wyindsøndøjkti, nayide'ents ja jaa'y pøn mijuy kamijuy tundip. ¹⁶Jøts wyanidi ku ayo'on jade'en t'ejxti:

—iWan ja kojpk wan ja tsaaj ne'egi xyik'o'ljknindi jøts jade'en xka'ukwin'ejxna'ant ja' pøn jam tsinaapy møj tsinaabyajt køjxp, jøts nayide'en ja Borreek U'nk ka' x'ukmøø'ña'ant ja møj ayo'on!

¹⁷Tøxi ja xøøw jade'en kya'pxy ku ja møj ayo'on jade'en yik'ijxy, nipøn ja jade'en tkamimajada'aky.

Ku ja Israelit jaa'y yikmø'øy ja ejxa'an pøn jaty ja Dios tyami'ejxip tyamidsojkip

7 Ku ja jade'en yjajty jøts ø n'ijxy nimaktaxk ja ankilis ku ja wyinaty tyani naxwii'ñit eskiini køjxp, jamts ja poj ja t'axajtuky jøts ja møk poj niwīne'en kyanaxkida'akt naxwiingyijxy mejkyijxy, jøts ja aay jøts ja kipy kyapojwidett. ²Jamts ø n'ijxy jadu'uk ja ankilis xøbidsimbyi myiñ, jap ja Dios syeyei tmøøt'ajtti pøn xemikøjxp jujky'ajtp. Nay ja'ats møk tnimaay ja nimaktaxkpi ankilis midi wyinaty tø yiktanipiky jøts tuki'iyi tyikwindigøøgyøxt tuktsajp'agida'aky, jøts wya'añ:

³—Uk'awejxti. Kidi xkaxti ja ayo'on kunim øøts ja ejxa'an nbikta'akt jaa'y wyimbojkøjxp nidu'uk nidu'uk, pøn jaty ja Dios yja' tpaduujnidip. Jaanimts xyikwindigø'øty ja naajx, ja mejy jøts ja aay ja kipy.

⁴Jade'en ø nnimadøøy ku tukmagø'pxy ja wixijky myaktaxk mil tø yik'ejxandi ja israelit

jaa'y pøn ja ñimakmajtskpi
y'apteety'ajttøø. ⁵Nimakmajtsk mil
idø'on yik'eixandi pøn tyatsk'apip
ja mōjaa'y Judá. Nimakmajtsk
mil yik'eixandi pøn tyatsk'apip ja
mōjaa'y Rubén jøts nimakmajtsk
mil nayide'en pøn tyatsk'apip
ja mōjaa'y Gad, ⁶nimakmajtsk
mil yik'eixandi pøn tyatsk'apip
ja mōjaa'y Aser, nimakmajtsk
mil yik'eixandi pøn tyatsk'apip
ja mōjaa'y Neftalí, nimakmajtsk
mil yik'eixandi pøn tyatsk'apip ja
mōjaa'y Manasés, ⁷nimakmajtsk
mil yik'eixandi pøn tyatsk'apip
ja mōjaa'y Simeón, nimakmajtsk
mil yik'eixandi pøn tyatsk'apip
ja mōjaa'y Leví, nimakmajtsk
mil yik'eixandi pøn tyatsk'apip
ja mōjaa'y Isacar, ⁸nimakmajtsk
mil yik'eixandi pøn tyatsk'apip
ja mōjaa'y Zabulón, nimakmajtsk
mil yik'eixandi pøn tyatsk'apip ja
mōjaa'y José, jøts nimakmajtsk
mil yik'eixandi nayide'en pøn
tyatsk'apip ja mōjaa'y Benjamín.

Ja mayjaa'y pøn ja poop wet wyet'ajttip

⁹Ku jade'en nnimadøøy
jøts ø n'ijxy janch may jaa'y
nikyamachooni. Choondi o magajp,
o ti ayuujk tkajpxti pøni sa jadu'uk
ja nidu'uk ja kajp ja y'ayuujk
tjagyepy; jam twindanidi mā mōj
tsinaabyajt jøts nay jam mā Borreek
U'nk, poop wet wyet'ajttip jøts
tiixy'aay tkøñidi. ¹⁰Niduki'iyyi
dø'on tjā'myatsti ja Dios jøts møk
wya'andi:

Yø Dios Teety xyiknitso'ok'ajtim,
pøn jam tsinaapy mōj
tsinaabyajtkøjxp,

nayide'ents ja Borreek U'nk.

¹¹Jamts ja ankilistøjk nawidity
tnadanidi mā mōj tsinaabyajt
jam, mā ja mōjaa'dyøjk jøts
mā ja nimaktaxkpi jiyujk, jøts
ñagyuxendyaajkidi ja' wyingujkp
mā ja mōj tsinaabyajt jam; mōj
tjanchja'myajtsti ja Dios, ¹²jøts
wyandøø:

Nmōja'wip øøts, njanchja'wip
øøts Dios Teety.

Mets ja møk'ajtin, ja ja'gyukin
jøts ja øy'ajtin mmøøt'ajtpy
xemikøjxp. Jade'en idø'on
xemikøjxp y'ejxi.

¹³Jøts nidu'uk ja mōjaa'dyøjk
wyaañ jøts x'amidøøy:

—¿Pøn idø'on yø'ødi ixja poop
wetxøødi, mā dø'on yø choondi?

¹⁴Jøts ø nnimaay:

—Mets mōjaa'y, mnija'wip mets yø'.
Jøts ø xnimaay:

—Yø' dø'on jap tø ñaxti mā ja mōj
ayo'on jam, ja Borreek U'nk ñi'jpy tō
yikpøkwy'a'achidi. ¹⁵Paty idø'on jam
y'etti mōj tsinaabyajt wyingujkp mā
ja Dios chøøni, jamts ja tpaduujnidi
ja Dios yja' xinaxy tsunaxy; jøts
ja pyøkjø'ogidit xemikøjxp ja'
wyingujkp. ¹⁶Ka'ap ja ayo'on
t'uk'eixnidit, kya'ukyu'oooknidit
kya'uktøøjtšiniidit, ni an niti
kya'ukpaajtniyidit, ¹⁷jade'engøjxp
ku ja Borreek U'nk t'eix'lity jøts
ttukpaatwa'añ ttuk'eixwa'añ ja
wa'ats nøø midi xyikjujky'ajtim
xemikøjxp; nayide'ents ja Dios
tyiktigø'øty ja yjotmay'o'jkindi.

Ja myiwixujkpi seeyi jøts ja
poomdø'y'i'iñ midi tum oori

8 Ku ja Borreek U'nk
ja myiwixujkpi seeyi

t'agø'øtstuujty, jøts kujkp hora'an y'amongøjxti niduki'iyi jam tsajpjotp. ²Nay jatyi n'ijxy ja niwixujkpi ankilis midi jam tanaadyip Dios wyingujkp ku ja yikmøodyi nidu'uk nidu'uk ja puxujx. ³Jøts jadu'ukpi ankilis myiĩn jøts jam tyanaay'øyi'ii'n altajr wyingujkp midi tum oori, poomdø'y'ii'n ja myimeen, jamts yikmøoy altajr wyingujkp may ja poom, jade'ents ja altajrkøjxp ttawinjøjky; jøts jamts ja nayide'en y'lity y'amido'owin pyøktso'owin ja'adi pøn jaty ja Dios ja'ajtip. ⁴Jøts ja poom jok jam yja'aty Dios wyindump møøt ja y'amido'owindi ja pyøktso'owindi pøn ja Dios tmøja'widip tjanchja'widip. ⁵Xjats ja ankilis tnixajiyi'ii'n ja poomdø'y'ii'n jøts tpiktaajky ujts ja jøndsabajk midi wyinaty altajrkøjxp, jøts tko'widijty jam naxkøjxp; winets ja møk anaaw jøts ja widsuk y'adi'ich, jøts ja tsaachmøk ujx.

Ja niwixujkpi puxujx

⁶Xjats ja niwixujkpi ankilistøjk tjøp'ejxti ttaxu'uxwā'andi ja puxujx.

⁷Ku ja myidu'ukpi ankilis xyuujxy, jøts ja møk tuu myiĩn jøts ja tøtst jøts ja jøøn møøt ja ni'jpy ñaxkidaajky. Jade'en tyøøy ja naxwii'niit jawaani kyagujkwa'kxy, møøt ja kipy møøt ja ujts kyudigøøy.

⁸Ku ja myimajtskpi ankilis xyuujxy, winets yjawī tigati ñaxkidaajky jam mejyotp ejxim ja møj kojpkīn, ja'ats jam tøøbyøjk; jøts ja mejy wyimbijty jawaani kagujkwa'kxy wa'ats ni'jpyin.

⁹Jawaani kagujkwa'kxy ja jiyujk

kya'ookøxti midi jam wyinaty tsinaadyip, jøts ja barki nayide'en wyindigøøy.

¹⁰Ku myidigøøkpi ankilis xyuujxy, winets tu'uk ja maadsa' tsajpwemp kyatska'ay, tyøøy jade'en ejxim ja møj jøønīn. Naxkidaajky ma may ja møj nøø yø'ødyi jøts ma ja kom nøø pyidsimy. ¹¹Ja'abi maadsa' txøøw'ajtp Ajenjo, jøts ja nøø ja tyikma'tnaa. May ja y'ooktøø pøn jaty ja t'uktøø, janch ta'am ja wyimbejtnaa ja nøø.

¹²Ku ja myimaktaxkpi ankilis xyuujxy, xjats ojts waani wyindigøy ja xøøw, ja po' jøts ja maadsa'. Nayide'en ojts xyaachkugoodsigyijxy sam yø xøøw yø po' wyindigøyin.

¹³Winets n'ejxpaaty tu'uk ja ankilis ñaxy tsajp kujk'am, jøts ja møk wya'añ:

—iMeets naxwii'niit jaa'y, mjanch'ayo'odip meets ku xmado'odit ja puxujx ku ttaxu'uxtit ja nidigøøkpi ankilis!

9 Ku ja myimagoxkpi ankilis xyuujxy, jøts n'ijxy tu'uk ja maadsa', tø wyinaty ñaxkida'aky naxwingijxy. Xjats yikmøoy ja ñi'awaajts ma ja møj jut jam midi nøjkxp ayodaajk. ²Xjats ja møj jut tyik'awaajch xjats ja jok yikxon jap pyidsimy sam møj orni jøtpyin; jøts ja xøøw tyikwingoodsiñaa, ni poj niti tka'ukyikyø'øñi. ³Japts jokjøtpy may pyidsømdi ja møj mu' jøts tuki'iyi ja naxwii'niit twinguyø'yigyøjxnaa; jade'en ja yikejxy sam ja kajpyin jøts ja naxwii'niit jaa'y tyik'ayo'ombaa. ⁴Ka'ap ja jade'en tø yikexy jøts ja aay ja ujts ja tyikwindigøøty ya

naxwiiñ. Ja' ja pyayø'opy pøn jaty ja Dios y'ejxa'anin tø kyabikta'agyì midì yikpiktaktip wyimbojkwemp. ⁵Ka'ap ja jaa'y tjadyimyik'øøky, ayo'on ja myøøpy jøts ja jajyi ja tøøyi tukmiba'am tsøøni magoxk po'ljin; jade'en ja pya'am ja tjawidi ejxim ja kajpy xøjpint. ⁶Møk ja tjawidi, jadyimwyandip ja' jøts tyimy'ookit; o kø'øm ñanky'oogidit, ka'anims ja y'o'jkin kya'pxti.

⁷Jade'en ja møj mu' kyaxø'økti ejxim ja møj kawaayin midì nay'a'ejxiyip tseptumbi nøjxktip; tum jade'en ja kyubajk kyaxø'økti koroni kujupy midì amuum oori, jøts ja wyeen ja y'aaw jade'en kyaxi'iky ejxim ja jaa'yin. ⁸Jade'en ja wyaay tmøøt'atti ejxim ja tø'øxyjkin, jøts ja tyøøjts jade'en t'ixy ejxim ja kaajin. ⁹Tum pujx ja amuum y'ak'ajttip, jøts ku kyajkwidetti jade'en møk yikmadøy ejxim ja maakyareti midì kawaay myinøjxktip tseptumbi. ¹⁰Jade'en ja tyu'tst tmøøtt'atti ejxim ja kajpyin. Ja'ats ja tyukta'ayo'ombatpy ja jaa'y jøts tukmiba'am tsøøni magoxk po'. ¹¹Jamts tu'uk ja ankilis midì tso'omp jap ayodaajkjøtpy, ja'ats tniwindsøn'ajtp ja møj mu'; ja'ats txøow'ajtp Abadón ja hebreit ayuujk, jøts ja griegit ayuujk Apolión midì tyijpy pøn yikwindigøøpy.

¹²Jade'en idø'on ja myidu'ukpi ayo'on ñajxy; naxkida'akpts ja mimajtskpi ayo'on.

¹³Xjats ja myidudujkpi ankilis ttaxuujxy ja puxujx, winets pyidsimy ja ayuujk jam nimaktaxkpi tsakaa waj agujk jam altajrkøjxp jam Dios

wyingujkp. ¹⁴Xjats ja myidudujkpi ankilis yiknimaay midì ja puxujx tmøøt'ajtp:

—Migaji ja ñimaktaxkpi ankilis midì jamdi ma ja møj nøø midì yiktejp Eufrates.

¹⁵Xjats ja jade'en yikmigajidøø jøts tyik'ookti jawaani kagujkwa'kxy ja naxwii'ñit jaa'y. Jabi a'ejxixi y'ejtni jøts ja jade'en yjattit ja'abi xøow ja'abi jumøjt.

¹⁶Namajtsk magø'pxy millones idø'on ja ankilis cheptumbi midì idø'on jade'en yikjaa'y'ooktip, midì kawaagyøjxpti.

¹⁷Yide'en ø n'ijxy kumaa'yjøtpy ja kawaay, jøts ja' pøn ttatsinaadyip, pujx ja myøøt'ajttip kyachwiiñ, tsajpts, tsujxk jøts pu'ts jade'en ja kyaxi'iky. Ja kawaay kyubajk jade'en ja kyaxø'økti ejxim ja kaajin jøts ja y'aawjøtpy pyidsimy ja møj jønyow møøt ja jok jøts jøky.

¹⁸Jøts jade'en'ampyts ja mayjaa'y y'ookøxti, jawaani kagujkwa'kxy idø'on kyawindigøøgyøxtøø.

¹⁹Ja'ats idø'on ja kawaay tya'awa'an'ajtpy ja y'aaw jøts ja tyu'tst; jade'en ja tyu'tst ja t'ixy tsaa'ngyubajkin, jade'ents ja jaa'y ja tyik'ayo'ombaaty.

²⁰Pønts jaaktandi ka'abyim ja tmajtsu'tutti ja ka'ødyunk ja ka'øwynmaa'ñ. Wyindsø'jkiy'ejttip ja mikutøjkti jøts øy ti awanax agojnax. Nayide'en twindsø'øgidi ja nugo dios agojnax midì oori øyip, midì plati øyip, midì bronce øyip jøts nayide'en midì kipy øyip, ka'ap ja y'ixy, ka'ap ja yø'øy, jøts ka'ap ja myadøy. ²¹Ni jade'en ja tkamøjpiktaajky ku ayo'on tø yjinaxy, yik'ook'adichpim ja

myigu'uk ja', jøts ja miku' tunk ttun'adø'øtsti, ñamyøøt'atyidi øy pøn møøt myigu'uktøjkti, jøts myaa ts'adø'øtsti.

Ja ankilis midi tkon'ejtp tu'uk ja mutsk libri'u'nk

10 Kuts jade'en yjajty jøts ø n'ejxpaaty tu'uk ja møj ankilis. Yoots'agujkp kyida'aky jam tsajpwemp jøts ja i'lch jam kyaxi'iky y'agubajkp. Jade'en ja wyeen ja y'aaw t'ixy ejxim ja xøøw y'añin, jøts ja tyeky jade'en ejxim ja jønyowin. ²Jam tu'uk ja libri'u'nk tmøøt'aty jøts ja t'agiibyajky kyøjøøm, jøts ja y'aga'ndyeky ttawinwa'aky ja mejy jøts ja y'anajtyeky naxwingijxy. ³Jøts ja chap'aay møk ejxim ja møj kaa myu'uyin jøts nay jatyi wixujk øjk ja anaaw pyijy. ⁴Ixyam øts wyinaty njaadyanwa'añ sa ja anaaw wya'añ jøts ø nmadoøy ja ayuujk midi kidakp tsajpwemp jøts ø xnimaay: —Amaa'tsk'at yø' sam tø wya'añ yø anaaw, kidi xjaadyañ.

⁵Jøts ja ankilis midi tuktamajndyeky tawa'kpajt ja mejy jøts jaduktamajndyeky ja naxwii'ñit, ja'ats y'aga'ngyø jam tkonjø'jk, ⁶jøts ja tkajpxwa'lkxy ja Dios tyiy'ajtin pøn tø tyiktso'ondakijxy tuki'iyi tuktsajp'agida'aky, jøts yide'en wya'añ:

—Ka' y'ukyøøñit ja xøøw ja jumøjt; ⁷kuts xyu'uxt ja myiwixujkpi ankilis, tø wyinaty kya'pxy ja Dios wyinmaa'ñ midi ja'ayi tyuknija'wiyii'ñ ja kyugajpxtyøjkti. Ka'ap ja o pøn nugo ajawi ttuknijawi.

⁸Xjats ja ayuujk nayide'en nmadoogojmi midi tsajpjøtpy

tsoo'mp, jøts ja jadigojk xmigajpxkojmi jøts wya'añ:

—Nøjkkx atspøjkít ja libri'u'nk midi jam agiibyaky kyiiy'ijtpy ja ankilis, ja' midi tanaapy mejkyøjxp jøts naxkijxy.

⁹Jøts ja ankilis nninijkxy xjats ja libri'u'nk n'amidøøy jøts ø xmo'ot, jøts ø xnimaay:

—Ixya ja libri, mats jøts x'ixpøkt. Øy tsuj mnayjawiyit ku x'ixpøjk'okwa'ant, ku x'ixpøjkøxnit jøts ja jotmay'øøgyi xpatnit.

¹⁰Xjats ja libri n'axajiyii'ñ jøts ja n'ixpijky, janch øy janch tsuj øts nja'wiyii'ñ, kuts ja nyikøjxnaa ja libri, jøts ja jotmay'øøgyi xpatnaa.

¹¹Jøts ø xnimaagyojmi:

—Kuwani jadigojk xkajpxwa'lkxt ja Dios yja' sa chøønidit sa tyanidit niduki'iyi ja naxwii'ñit jaa'y, wan tmøji wan tmutski.

Namajtsk ja jaa'y pøn testigi'ajttip

11 Jøts tu'uk ja kapy nyikmøøy midi yiktakejpxp, jøts ø xnimaay:

—Tani jøts xkejpxit ja Dios chaptøjk møøt ja altajr, jøts nayide'en xmacho'ot pøn jaty jap twindsø'jkip ja Dios. ²Ka'ap yø xkepxt yø tsaptøjk aaw, tsaptøjk øjx jøts ja tsaptøjk paa' ja'agøjxp ku wenk jaa'y myenwa'andi jøts jap wyidettit, jade'ents ja tyikma'attit ma jaty ja wyidettit jap Dios kyajpjøtpy, wixijky myajtsk po' y'ettit jade'en. ³Ngaxp øts namajtsk ja ngugajpxy midi tum yøk wet twet'ajttip, ja'ats xkajpxip ja nja' tigøøk jumøjt jagujkp.

⁴Ja namajtskpi kugajpxy, jade'eñi n'ukpiktaajkin ejxim ja olivi

kipyín, jòts nayide'en ejxim ja majtskpi kandleeleri midì jam ejtp nwindson'ajtim wyingujkp.
⁵Pòni pòn midundigòowayajnip, yikpidsòmdip ja jòon ja y'aawjòtpy, jade'eñits ja myidseptòjk tyik'ookòxtit tyikwindigòogyòxtit.

⁶Yò namajtskpi kugajpxy yjagyajpti ja mòk'ajtin jòts ka'ukyiktunit winò'onin ja Dios yja' tkajpxwa'kxidit. Nayide'en ja nòò tyikjajtnidit wa'ats ni'jpyin, jòts tkaxtit kawinaak jòòjp ja pa'am sa ja kò'òm t'a'ejxidit. ⁷Kuts ja jade'en tkajpxwa'kxkòxtit ja Dios yja', winets tu'uk ja mòk awa'an jiyujk pyidsò'òmt jam ayodaajkjotp jòts ja namajtskpi kugajpxy yik'oogiyit.

⁸Jamts ja oo'kpi jadi'iñi tya'ant, jam ja wyibejpnit jam tuu' kujk'am, nay ja kajp ma ja nwindson'ajtim Jesucristo kyiruspejty. Nugo dò'on jade'en yò kajp yiktijy Sodoma jòts Egipto. ⁹Tigòok xòow jagujkp yik'ejxtit yiknijawidit ja oo'kpi. Øy pòn jaa'y o magajp mye'endit jòts ka' tnankyikpidi'igyì ja oo'kpi.

¹⁰Xjats ja naxwii'ñit jaa'y jade'en agujk jotkujk ñayjawiyidi, janch nixem niyam o ti ñadyamay'atyidi ja'agòjxp ku tò y'ookti ja'adi pòn mòk tò yik'ayo'ombaadyidi pòn ja Dios yja' tkajpxwa'kxidip. ¹¹Xjats ku myidigòok xòow jagujkp'ajty, winets ja Dios tyikjukpyiky jadìgojk ja oo'kpi. Janch tsò'jkidòò ja'adi pòn jaty jam wyinatyi.

¹²Winets ja namajtskpi kugajpxy mòk yikmigajpxti, tsajpjòtpy ja kyajpxy, jòts yiknimaydi:

—Pat yam.

Jòts chapajtnidi tsajpjòtpy yoots'agujkpy jòts ja myidseptòjk

y'ejxidòò ñija'wiyidòò. ¹³Jòts nay jatyì ja mòk ujx ñajxy, jòts wixujk mil ja jaa'y y'ookti ku ja kajp kyuja'wiyi'ñ kyujejtii'ñ. Janch tsò'jkidip ja' pòn jaty jaaktandòò, jòts ja Dios ja tjanchja'myajtsti midì jap tsajpjòtpy.

¹⁴Jade'en ja myimajtskpi ayo'on ñajxy; tsòjks mye'ent ja myidigòokpi.

Ja myiwixujkpi puxujx

¹⁵Xjats ku ja myiwixujkpi ankilis ttaxuujoy ja pyuxujx, jòts mòk yikmadòy may ja ayuujk jap tsajpjòtpy jòts wya'añ:

Ixyam ja kutujk ñaxkida'aky midì ja Dios Teety jòts nwindson'ajtim Jesucristo yja'ajttip;

jòts xemikòjxp ja tyiktu'undit ma y'ljty ja naxwii'ñit jaa'y yja' tyiktundi.

¹⁶Xjats kyuxanidi jòts ñaxkowdi ja ni'ee'pxmaktaxkpi mòjaa'dyòjk pòn jam tsinaadyip Dios wyingujkp, jòts ja Dios tmòjawidi twindsò'ogidi,

¹⁷jòts yide'en wya'andi:

Janch mòj me Dios Teety, tu'ugyi me m'ity xemikòjxp.

Mòj øòts nmòjawi

ngunuu'kxyjawi ku tò

xyikmajada'aky ja mmòk'ajtin jòts ja mgutujk ma ja naxwii'ñit jaa'y.

¹⁸Jòts ja naxwii'ñit jaa'y

mmijot'ambikyiyi,

tò kya'pxy jòts ja ayo'on xmo'ot jòts nayide'en xiidyu'unt ja oo'kpitòjk.

Jòts xmo'ot ja øy'ajtin pòn jaty ja mja' tò mbadu'unxixyi pòn jaty tò tkajpxwa'kxy wan tmòji wan tmutski.

Tø kya'pxy jøts nayide'en
 xyikwindigø'ty pøn jaty tø
 tmidundigøy ja naxwii'ñit
 jaa'y.

¹⁹Xjats ja Dios chaptøjk y'awaajch
 jap tsajpjøtpty jøts yik'ixy ja kaaxi
 ma jap y'ity ja Dios kyutujk. Xjats
 ja møk uyx ñajxy jøts ja anaaw, jøts
 ja widsuk jøts ja møk tøtst ñaxkid
 aajky.

Ja tø'øxyøjk jøts ja awa'andsaa'ñ

12 Xjats winet kyaxi'iky
 tu'uk ja møj ejxpajt
 jam tsajpwemp: jamts tu'uk ja
 tø'øxyøjk tyani po' kyubajkp.
 Jade'en yø møk chamamy sam ja
 xøøwin, jøts tkujup'aty tu'uk ja
 koroni midi makmajtsk maadsa'
 tjagyajp. ²Jøtpyts ja tø'øxyøjk
 wyinaty, ka'axwampts jøts møk ja
 y'u'nk ja yik'ayøyi jøts kyaxø'økt.
³Winets jam tsajpwemp n'ijxy
 jadu'uk ja ejxpajt: jamts tu'uk ja
 awa'andsaa'ñ, amuum tsajpts ja
 ñine'kx jøts wixujk ja kyubajk,
 majk jaty ja wyaj nidu'uk nidu'uk
 ja kyubajk tmøøt'aty, jøts ja koroni
 nayide'en tu'uk jaty tkujup'aty.
⁴Jøts ja tyu'tst ttabajaa'xkijxy may
 ja maadsa' jam tsajpwemp, jøts
 naxkijxy ja tñajtswøjiyi'ñ. Jam
 tyanaay'øyyii'ñ ma ja tø'øxyøjk
 jam kya'axwa'añ jøts ja y'u'nk
 jaty tsu'jtsit ku ja kya'axt. ⁵Ka'ax
 ja', mixyu'nk ja', ja'ats nøjkk
 niwindsøn'aty møk'ampy ja
 naxwii'ñit jaa'y. Xjats ja y'u'nk ja
 Dios tpøjknaa jøts ja tyiknijkxy
 ma ja møj tsinaabyajt jam; ⁶jøts
 ja tø'øxyøjk kyeeky, jøts jam ja
 ñøjkxni ma abak et, ma ja Dios jam
 wyinaty ja y'et tø t'a'ejxi, jamts ja

kya'aty agujk jotkujk, jade'ents jam
 chøønit tigøøk jumøjt jagujkp.

⁷Xjats ku jade'en yjajty winets ja
 tsep tyuujni jap tsajpjøtpty. Ja møj
 ankilis Miguel møøt ja y'ankilistøjk
 minamyajtsi ja awa'andsaa'ñ møøt
 ja y'ankilistøjk ja' møøtmi. ⁸Ka'ap
 ja myajadaktøø ja awa'andsaa'ñ;
 ka'ap ja ma y'uk'etnibajtniyi
 tsajpjøtpty. ⁹Jøts ja jade'en
 yikpawojpnaa, yikaxni naxwingijxy.
 Yø' dø'øn ja møj miku' windsøn
 midi yiktejp Satanás midi twin'øø'n
 ja naxwii'ñit jaa'y.

¹⁰Winets nmadøøy møk ja kajpxy
 jap tsajpjøtpty midi yide'en wamp:
 —Tø ja Dios ja naxwii'ñit jaa'y
 tyiknitso'ok'aty. Tøts ja myøk'ajtin
 tñanky'ijxyiyi jøts ja kutujk tmø'øy
 ja Cristo sa ttanitanit ja yjaa'y;
 tøts ja nayide'en tpawøpy ja' midi
 xinaxy tsunaxy tni'øø'nip jam Dios
 wyindump ja' midi tø y'ookti Dios
 køjxp. ¹¹Tø tmimajada'akti ja miku'
 yja', ja'agøjxp ku ja Borreek U'nk
 tø tkudsuni tkudaxi ja naxwii'ñit
 jaa'y, jøts ku tø tñigajpxkøxti
 sa tjanchjawidi ja Dios yja', wan
 tjaty pøni sa jyaty. ¹²Ejtni xoni
 meets pøn jap tsajpjøtpty, jøts janch
 yik'ayow meets pøn ya naxwii'ñ
 tyiknajxtip. Tø meets ja miku'
 mnimee'nnyidi jøts awa'an'ampy
 mga'ødyunidit, ñija'wipxi ja' ku
 tsojk kya'pxt.

¹³Xjats ku ja awa'andsaa'ñ
 tja'wiyii'ñ ku ja ya naxwii'ñ tø
 yikajxni, xjats ja tø'øxyøjk ja
 tpayø'øy pøn ja y'u'nk wyinaty tø
 tyikaxi'iky. ¹⁴Winets ja tø'øxyøjk
 yikmøøy majtsk ja weejts
 myøjkajnk, jøts ja kyajknijky ma
 ja y'et ja jam abak etjotp. Jade'en

ja tnikejky ja awa'andsaa'n̄. Jamts ja kya'aty yjөө'kxt amgujuk jotkujuk tigөөк jumөjt jagujukp. ¹⁵Jөts ja awa'andsaa'n̄ ja mөj kom нөө tyikpidsimy y'aawjөtpty, jade'ents ja tө'өxyөjk ja tyikjө'twа'añ; ¹⁶jөts ja tө'өxyөjk ja naxwii'n̄it pyudөjkiyi. Mөj et aaw awaajts, japts ja нөө jadi'iñi tyөtskөjxnaa. ¹⁷Jade'ents ja awa'andsaa'n̄ mөk tm'iambijky ja tө'өxyөjk, jөts ja tmidsepjky ja y'ap ja y'ok. Jade'en idө'өн ja'adi pөн ja Dios yja' tpaduujnidip sam ja nwindson'ajtim Jesucristo tniгаjpxy.

Namajtsk ja mөj ka'өy jiyujk

13 Jam ө mejy'agө'өm nwa'k'өyiyii'n̄ jөts ө n'ijxy jam pyidsimy tu'uk mөj ka'өy jiyujk. Wixujk ja kyubajk tmөөt'aty jөts majk ja wyaj. Tu'uk tu'uk ja wyaj tmөөt'aty ja koroni, jөts jam kyubajkөjxp yikja'ay ja letri midi ja Dios kya'өyja'wip. ²Jade'en ja kyaxi'iky ejxim ja mөj kuxibyijyin, jөts ja tyeky kyaxi'iky ejxim ja osa'an, jөts ja y'aaw ejxim ja kaajin. Ja'ats ja awa'andsaa'n̄ mөөjyi tuki'iyi ja myөk'ajtin ja kyutujk midi ja wyinaty myөөt'ajtpy. ³Jade'en ja kyubajk tu'uk kyaxi'iky ku janch mөj tө chaachi, tyimiyik'ookwajnip. Ka'ats ja yik'ol'jki, tsoojk ja'. Kuts ja t'ejxti ja naxwii'n̄it jaa'y, ñigyumaap ja tja'widyөө xjats ja tpadundi ja yja'. ⁴Nayide'ents ja tmөjawidi twindsө'өгиди ja awa'andsaa'n̄, ja'agөjxp ku wyinaty tө tmө'өy ja myөk'ajtin ja kyutujk ja mөj ka'өy jiyujk, jөts ja nayide'en yikwindsө'өги. Yide'en ja wya'andi ja naxwii'n̄it jaa'y:

—iPөн jade'en t'uktu'ump sam yө mөj ka'өy jiyujk, pөnts jade'en ukmajada'akp!

⁵Xjats ja mөj ka'өy jiyujk yikmөөy ja tuu' jөts ja mөk'ajtin jөts tjemnөjmit ttenөjmit ja Dios yja', wixijky myajtsk po' y'ett. ⁶Jade'en idө'өн ja ttuun̄; tuki'iyi tmigajpxigөөy midi ja Dios yja'ajtpy jөts ja xyөөw jөts ja chinaadyaajk, jөts midi ejtp tsajpjөtpty, tuki'iyi ja yikmigajpxigөөgyijxy. ⁷Nayide'en yikmөөy ja tuu' jөts tmөөtseptu'unt pөн jaty ja Dios yja' tpaduujnip kunim ja tmimajada'akt; jade'en ja kyutujk yikmөөy jөts tniwindsөn'att niduki'iyi ja naxwii'n̄it jaa'y.

⁸Jөts ja naxwii'n̄it jaa'y jade'en twindsө'өги ja mөj ka'өy jiyujk, ja' tpadundip jade'en pөн jaty kajaabyety jap нөkyjөtpty kuuyip ja naxwii'n̄it cho'ondaajky. Yө' нөky ja Borreek U'nk myөөt'ajtpy midi tө y'өөky adөmgөjxp.

⁹Өy yikxon madowdi. ¹⁰Pөni pөн ja myigu'uk tsump, nayide'ents ja yiktsu'umt; jөts pөni pөн ja myigu'uk tyik'ookp, nayide'ents ja yjatt. Paty chөkyi mduda'akyjaa'y'attit jөts x'ajot'attit ja Dios sam pyaat'atyi pөн ja Dios yja' tpaduujnip.

¹¹Jөts jadu'uk ө n'ijxy mөj ka'өy jiyujk pyidsimy naxjөtpty. Majtsk ja wyaj tmөөt'aty jade'en sam ja borreegi wajin, jөts jade'en kyajpxy sam ja mөj awa'andsaa'n̄.

¹²Nayide'en ja kyutujk tjagyepy sam ja myiga'өy jiyujk midi ja kyubajk tsaachiyii'n̄, jөts yө tnөjmit ja naxwii'n̄it jaa'y jөts yikwinjawit yikwindsө'өгит. ¹³Nayide'ents ja myilagri'ajtin tnan'ky'ijxyi, mөj

jøøn tyiktsøøñ tsajpwemp jøts naxkijxy tyiknaxkida'aky, jøts ja jaa'y ttuk'ixy wyemp amp.

¹⁴Jade'en'ampy ja jaa'y twin'iin ku myilagri'ajtin tnanky'ijxyi, xjats ja naxwii'ñit jaa'y tnimaay jøts tyik'øyt ja tsamaxan ja awanax midi t'ejxp jade'en sam ja møj ka'øy jiyujk midi tsaachiyi'iñ.

¹⁵Xjats ja yikmøøy ja møk'ajtin jøts tyikjujukpyøkt tyikajpxt ja tsamaxan, pønts ja kawindsø'jkijy, yik'ookp ja'. ¹⁶Xjats nayide'en ja møj ka'øy jiyujk ja y'ejxa'anin tpiktaajky kyøjø'øm uk wyimbojkwemp tuki'iyi ja naxwii'ñit jaa'y, wan tmøji wan tmutski, wan tkumeeñ jaa'yi, wan t'ayoobi jaa'yi, øy ja yjawindsøndøjkidi, øy ja yjatumbitøjkidi. ¹⁷Ka'ap pøn mibaat ti tjuy, ti tkajpxy, ti ttøøky, ku ja y'ejxa'anin tkamøøt'atti midi ja møj ka'øy jiyujk tø tpikta'aky. Ja' y'ejxa'anin'ajtpy ja xyøøw jøts ja ñumeri. ¹⁸Yø'øbi numeri ka'ap yø o pøn tnijawi; ja' yø tnija'wip pøn yikxon t'a'ejxip. Yø jade'embì numeri, jade'en yø kyajpxy ejxim ja jaa'yxøøwin, tudujk magø'pxy ja tugi'pxyudujk jade'en ja'.

Ku ja tukmagø'pxy wixijkxy myaktaxk milbi jaa'y y'øowdi

14 Kuts jade'en yjajty jøts ø n'ejxpaaty ja Borreek U'nk jam tyani kojpkøjxp ma yiktijy Siòn. Tukmagø'pxy ja wixijkxy myaktaxk mil ja jaa'y tmøødi pøn wyinaty wyimbojkwemp tø yikpikta'aky ja Dios Teety xyøøw jøts ja Borreek U'nk yja'ami. Ja'ats idøøn ja y'ejxa'anin'ajttip. ²Jøts nmadøøy møk wyina'añ tsajpjøtpy

ejxim ja møj nøø y'iichin jøts ja møk anaawin; jade'en yikmadøy wyinaa'ñ ejxim ja maagyow midi yiktejp arpi. ³Jamts ja jemy'iyy t'øowdi ma ja møj tsinaabyajt jam, ma ja nimaktaxkpi jiyujk jam jøts ja møjaa'dyøjkti. Nipøn ja'abi iyy tkajaty, ja'ayi tjajttip pøn nitso'ok'ajtti ya naxwiiñ, tukmagø'pxy ja wixijkxy myaktaxk mil jade'en ja'adi. ⁴Wa'ats øy tsuj yjaa'y'atti jøts ka'ap ja o pøn tøøxyøjk tmøøt'atti, tu'ugyi tpadundi ja Borreek U'nk pøni ma ja ñijkxy. Yø' døøn ojts jawyeen ñadyamiyøxyidi ma ja Dios Teety jøts ja Borreek U'nk, jade'en yø ttanitso'ok'atti. ⁵Ka'ap ja win'øø'nin, ka'ap ja taay'ajtin tjagyapti, øy tsuj wa'ats yjaa'y'atti Dios wyingujkp.

Kyugajpxy'atti ja nidigøøkpì ankilis

⁶Winets ø n'ejxpaaty jadu'uk ja ankilis midi kajkwidajtp jam tsajp kujk'am. Ayuujk myimimpy jøts tkajpxwa'kxwa'añ sa ttanitso'ok'attit ja naxwii'ñit jaa'y o magajp o ma'ayuujk. ⁷Jøts møk kyajpxy yide'en:

—Windsø'øgidi winjawidi ja Dios, tø kya'pxni jøts ja tiidyu'unin ñaxkidaknit. Jade'ents xwindsø'øgidit ja Dios pøn ja tsajp ja naajx tyik'øyiyi'iñ tuki'iyi.

⁸Xjats jadu'uk ja ankilis pyamiñi midi waan:

—Tø ja møj kajp Babilonia wyindigøy, ja'agøjxp ku tuki'iyi ja naxwii'ñit twin'iin jøts ttuktuñ sam ja kya'øyjaa'y'atti.

⁹Xjats ja ankilis jadu'uk pyamengojmiyi, jøts ja møk nayide'en wya'añ:

—Pøni pøn ja twindsø'jkip ja ka'øy jiyujk jøts ja y'awanax, jøts jade'en yik'eixa'andit wyimbojkwemp uk kyøjø'øm, ¹⁰yø'øts ja ayo'on yikmo'odip ja'agøjxp ku ja Dios tø tyikjotma'atti; jade'ents ja jøøn jøts ja jøky tyukpaadidit tyuk'ejxidit Dios y'ankilis wyindump jøts ma ja Borreek U'nk jam. ¹¹Xemikøjxp ja ayo'on jap t'ejxtit, nijuuni ja poj xyuxy'ajtin tkapaajtidit. Xinaxy tsunaxy ja y'etti pøn tø twindsø'øgidi ja ka'øy jiyujk jøts ja y'awanax, sam ja tø yik'eixandi nidu'uk ja nidu'uk. ¹²Jade'ents yø chøkyi jøts møk y'ettit tyuda'aky'attit pøn ja Dios ja'ajtidip jøts ja y'ana'amin tpaduujnidi, jøts pøn ja Jesús møøt tu'ugyi ettip.

¹³Winets nmadøøy møk kyajpxy tsajpjøtpy jøts ø xnøjmi:

—Ja' ya'at: “Pyaattipts ja øy'ajtin xondaajkin ku y'ookitit tyigø'ødyit pøn ja nwindson'ajtim Jesucristo tjanchja'widip.” Nayide'en ja Espíritu Santo wya'añ jøts y'ejtnit ejtni xoni jøts ja y'øy'ajtin pyudøkiyit nayide'en.

Sa ja Dios ttiidyunwa'añ ja naxwii'ñit jaaj'y

¹⁴Xjats ø n'ejxpatkojmi, jam ø n'ixy tu'uk ja jaaj'y chøøni poop yootskøjxp, koroni kyujup'ajtpy midi tum amuum oori, jøts ja møj tsujx tkap'ity. ¹⁵Jøts jadu'uk ja ankilis pyidsimy ma ja Dios chinaadyaajk jøts møk tmigajpxy midi jam yootskøjxp tsinaapy:

—Kajpjø'øk yø tsujx jøts xyikpidø'økt yø pikta'aky; tiempi yø' jøts pyidø'knit, tø yø myijaani yø pikta'aky midi naxwii'ñit'ajtp.

¹⁶Xjats ja' midi tsinaapy yootskøjxp, nay jatyits ja møj tsujx ttaapo'otmujky ja pikta'aky.

¹⁷Xjats jadu'uk nayide'en ja ankilis pyidsiimy ma ja Dios chinaadyaajk jap tsajpjøtpy, jam tu'uk ja møj tsujx janch jøøjp nayide'en tkapi. ¹⁸Altajr wyingujkp jadu'uk ja ankilis chøøñ midi t'ejx'ejtp ja jøøn jam altajrkøjxp. Ja'ats møk tyajxyi'iñ midi ja tsujx tmøøt'ajtp, jøts tnimaay:

—Kajpjø'øk yø møj tsujx jøts xyikpidø'økt yø uvi tsa'am kumi tø yø myijaani.

¹⁹Jøts ja ankilis ja tsujx tyiktuuñ naxkixy, jade'ents ja uvi tsa'am tyikpidi'jky, japts ja t'abøjkiyii'ñ y'abøjk'ii'ñjøtpy ma yikmøø'kxt, jade'en idø'on yø tijy ku ja Dios møk ja ayo'on tyiknaxkida'akt.

²⁰Jam kajp wingon ja uvi tsa'am yikmii'kxy, jøts ja ni'ljpy kom'ampy pyidsiimy. Kawaay y'aawgijxy ja yja'aty jadine'en ja kyøjki, jøts yø'øy tigøøk magø'pxy kilometri.

Ja wixujk ayo'on midi ja ankilistøjk yikme'endip

15 Kuts jade'en yjajty jøts n'ixy tsajpwemp jadu'uk ja ejxpajt, janch adsø'jkibim: jade'ents ja niwixujkpi ankilis tmimiñ ja wixujkpi ayo'on midi tø yiktanipiky, kuts ja ayo'on ñaxt jade'ents ja Dios y'ambøjkin yjøpkøxt.

²Jøts ø n'ejxpaaty tu'uk ja mejy janch wa'ats, janch tøø'kxp, jønyowin kyaxi'iky. Jamts mejy'agø'øm tyanidi niduki'iyi pøn tø tkabadundi ja ka'øy jiyujk yja' jøts ja y'awanax, sam nayide'en ja ñumeri tø tkagupøjkidi. Jamts

ja kow ja tmøøt'atti midi ja Dios tø myø'øyidi. ³Jøts ja t'owdi ja mōjaa'y Moises y'iyy pøn ja Dios kyugajpxy'ajt, jøts ja t'øømidi ja Borreek U'nk yja', midi nømp:

Tu'ugyi me Dios Teety ja møk'ajtin xjagyepy.
 Jøts midi tø xyik'øyi,
 janch øy janch tsuj jøts kamidaabyaadyim;
 janch tiy'ajtin ja' midi mdumpy
 midi mbiktakpy, jøts
 xnideety'aty xnimōjaa'y'aty ja
 naxwii'ñit jaa'y.

⁴¿Pøn Dios Teety
 mga'uktsø'øgiyip, jøts pønts
 mga'ukwindsø'øgiyip?
 Pø tu'ugyixi mets mwa'adsi.
 Mwinjawiyip mjanchjawiyipts
 niduki'iyi ja naxwii'ñit jaa'y,
 ja'agøjxp ku mdiy'ajtin
 xnanky'ijxyi sa mduñ sa
 mbiky.

⁵Nay winets ø n'ejxpaajty ku ja Dios chinaadyaajk y'awajch jap tsajpjøtpy ma yikpøkji'iky ja Dios kyutujk. ⁶Nay japts pyidsømdi ja niwixujkpi ankilis midi myimendip ja wixujkpi ayo'on. Ja' wyet'ajttip ja øybi wet midi janch tøø'kxp janch tsamamp. Midi chum'ajtpy, amuum oori ja', kyachwiiñ ja chum yja'aty. ⁷Nay winets ja ñamaktaxkpi jiyujk nidu'uk ja niwixujkpi ankilis tmøøø kitu'uk ja kopi midi amuum oori. Ujts ja ayo'on ja tmøøt'aty midi ja Dios yajkpy, midi xemikøjxp jujky'ajtp. ⁸Jøts nayide'en ma ja Dios chinaadyaajk tø ja jok kawinø'on jap tø tya'tspøjkni. Ja Dios myøk'ajtin jade'en adøtsp jøts nipøn jap mibaat kya'uktøjkiñi kunim yjøpkøxt ja wixujkpi ayo'on

midi ja niwixujkpi ankilis yiktamig ajxidip.

16 Kuts jade'en yjajty xjats nmadøøy møk kyajpxy jap ma ja Dios chinaadyaajk, xjats ja niwixujkpi ankilis tniimaay:

—Nøjkx atsyiktawaatstit yø wixujkpi kopi jam naxwingøjxp, ja ayo'on yø myøøt'ajtpy midi ja Dios yajkpy.

²Winets ja myidu'ukpi ankilis tyiktawaajch ja kyopi jam naxwingøjxp, jøts ja jaa'y pyatkøjxniyi ja tsamaax jøts ja ka'øbyu'uts. Ja' jajttip niduki'iyi pøn ja ka'øy jiyujk ja y'ejxa'anin tmøøt'ajttip jøts pøn twindsø'jkidip ja y'awanax.

³Xjats ja myimajtskpi ankilis mejyjotp ja kyopi tyiktawaajch, jøts ja yjajtnaa wa'ats ni'jpy ejxim ja jaa'y ni'jpyin ku pøn chaachi, jøts ja y'oo'køjxni niduki'iyi midi jaty jam tsinaapy mejyjotp. ⁴Jøts ja myidigøøkpki ankilis ja kyopi tyiktawaajch møj nøøjotp jøts ma jaty ja nøømu'ut. Nayide'ents ja wyimbejtnimaa wa'ats ni'jpy.

⁵Winets nmadøøy ja ankilis midi tniwindsøn'ajtp ja nøø ku wya'añ:
 —Me Dios Teety, tiy'ajtin ku jade'en xuñ. Janch øy janch wa'ats mets, jøts xemikøjxp me m'ity, ⁶ja'agøjxp jade'en yjatti ku mets ja mjanchja'wibitøjk yikjemdundi yiktedundi, tø tyik'ookti, kawinø'on tø tyiktsuñ tyiktaxy. Paty mets ja nøø xyikwimbejtni wa'ats ni'jpy jøts yø t'uukti; jade'ents yø pyaat'atyidi.

⁷Nmadøøy nayide'en ku jap altajrwimpy kyajpxy yide'en:
 —Mets Dios Teety, tu'ugyi mets ja møk'ajtin xjagyepy, ku

naxwii'ñit jaa'y jade'en tō xpayø'øy, tiy'ajtingøjxp idø'on ja tō xuñ.

⁸Jøts ja myimaktaxkpi ankilis tyiktawaajch ja kyopi jam xøow wyingøjxp, jøts ja xøow ja myøk'ajtin tpijky, jøts ja jaa'y chaaba'oo'kniyi ja xøø'an.

⁹Øy ja kawinø'on ja xøø'an yjatsa'yidi ni jade'embaats ja wyinmaa'n ja tkayiktigatsti. Ni jade'embaat ja Dios tkaja'myatsti ku ayo'on tja'ejxti, ne'egi ja Dios tmigajpxigøy'adø'øtsti.

¹⁰Jøts ja myimagoxkpi ankilis tyiktawaajch ja kyopi ma ja møj ka'øy jiyujk ja myøjtsinaabyajt jam, jøts tuki'iyi kyoodsigyijxy winø'ombaat t'ane'emy ja yjaa'y. Øy ja ayo'on ja møk tja'ejxti, jadi'iñits ja tjantyimyimajada'akti. Nugo ja tyoojts ja tjanch'atsu'utsmukti; ¹¹ni jade'embaats ja tkamajstutu'uty ja kya'øy'ajtin midi ja tyundip, ne'egi ja tmigajpxigøy'adø'øtsti ja Dios pøn jap tsajpjøtpy, ja'agøjxp ku ayo'on ja jade'en ttuk'ijxy.

¹²Xjats ja myidudujkpi ankilis tyiktawaajch ja kyopi møj nøøjotp midi yiktejp Eufrates. Ku jade'en ttuun jøts ja tyijch, jøts ja tuu' jam y'awaajch, jøts ja møj windsøndøjk jam ñajxti midi tsoo'ndip xøøbidsimdo'ampy.

¹³Winets ø n'ijxy ku ja miku' pyidsimy jap awa'andsaa'n y'aawjøtpy. Nayide'en pyidsømi jap møj ka'øy jiyujk y'aawjøtpy, jøts nayide'enmi jap kugajpxtyøjk y'aawjøtpy midi nadyejidip ku ja Dios tkugajpxy'atti jøts twindaay'atti nugo ja jaa'y. Nidigøøk ja miku' jade'en pyidsømdi ejxim ja pokleenin.

¹⁴Yø'øbi miku' jade'en ja møj ejxpajt ñanky'ejxip jøts niduki'iyi ja møj windsøndøjk tyiknamyukøxwa'añi pøn ya naxwiiñ. Jade'ents ja tsep t'a'ejxidit ku ja xøow tpaatt jøts ja Dios tmime'ent ja myøk'ajtin midi ka' pøn tmi'abaaty. ¹⁵Yide'en ja Dios wya'añ: "Ukmadowdinim, adsu'uky ø nme'ent ejxim ja maa'tspa'an, nipøn tkanijawī. Tya'øy'ajttip ja Dios kyunuu'kxin pøn nay'ejx'ejtidip nabyøkjø'kidip. Ka'ap øts xmidsø'odyu'unt ku nme'ent." ¹⁶Jøts ja møj windsøndøjk ñamyukøjxidøø ma jam hebreo ayuujk tejti Armagedón.

¹⁷Xjats ja myiwixujkpi ankilis tyiktawaajch ja kyopi pojotp jøts yikmadøøy møk kyajpxy midi tsoo'mp jap tsajpjøtpy ma ja Dios chinaadyaajk, jøts wya'añ: —Tø y'øyigyixy jøts tyunit jøts yjatit.

¹⁸Jøts møk ñaxkidaajky ja widsuk, jøts wyinanguejky ja anaaw, jøts ja tsaachmøk uyx myiñ midi ka'anīm windii yik'ijxy yiknijawi ya naxwiiñ. ¹⁹Xjats ja møj kajp Babilonia y'ajaabajky tigøøk ween. Jade'en'ampy jade'en ja Dios tyuñidi ku ja kya'øyjaa'y'atti jøts jade'en ambøjkin'ampy tyukjii'kxyidi ja ayo'on. Tuki'iyi ja kajp wyindigøøgyijxy jøts yjaajø'kijxy ya naxwiiñ. ²⁰Wyindigøøgyijxy ja naajx midi jam mejkyujk'am jøts ja kojpk nayide'en yjaity. ²¹Nayide'en ja jaa'y pyajtigøøjyøø ja tøtst midi je'mch'ajtp wixijky kili tu'uk tu'uk. Ni jade'en ja jaa'y tkaja'myatsti ja Dios øy yø sa wya'n'adø'øtsti, øy ja ayo'on møk tō yjayikmo'odi.

Ku ja ka'odyo'oxy tɔ pyajtniyi
ja myiwin'oo'mbi

17 Kuts jade'en yjajty, jɔts
myiĩn nidu'uk ja ñiwixujkpi
ankilis midi tmøot'ajttip ja
wixujkpi kopi, jɔts ø xnimaay:

—Men, jɔts ø n'uktuk'ext sã
y'ayo'ombaatt ja ka'odyo'oxy
pøn jam tsinaapy mejwyingøjxp.
²Yø møj windsøndøjkti pøn ya
naxwiiñ, tɔ yø tmøotpøktyundi yø
ka'odyo'oxy. Jade'ents ja naxwii'ñit
jaa'dyi tɔ ttuktuñ ttuknijawi ja
kya'øyjaa'y'ajtin, jɔts jade'en
tu'ugyi tɔ yikwin'oo'nidi.

³Nayi kumaajyøtpy ja Espiritu
Santo xuk'ijxy ku øts ja ankilis
xyiknijkxy jam møj abak etjotp, jamts
ø n'ijxy tu'uk ja tɔ'øxyøjk ttatsøoni
tu'uk ja møj ka'øy jiyujk, tsajpts ja'
jɔts wixujk ja kyubajk, majk ja wyaj
tmøot'aty, amuum nija'ay ja y'ak midi
kya'ødyamigajpxy ja Dios. ⁴Jɔts ja
tɔ'øxyøjk ja wyet twet'aty tsuu'nk
jɔts tsajpts, amuum oori xyox'ajtpy,
jam n'ijxyimbi nga'ijxyimbi. Jamts
ja kopi tu'uk tmach'ity midi amuum
oori, ujts ja kopi nayide'en tmøot'aty
midi kyada'øyjaa'y'ajtpy; ⁵jɔts
wymbojkwemp ja letri tmøot'aty
midi ka' nugo ajawi yiknijawi.
Yide'en ja tijy: “Ja møj Babilonia midi
tnigubajk'ajtp ja ka'odyo'øxyøjkti, ja
ka'odyunk jɔts ja ka'øwyinmaa'ñ.”
⁶Jɔts nay jatyi n'ijxy ku ja
ka'odyo'oxy myu'ugyi, ja ni'jpy tam
ja muujkip pøn ja Dios ja'ajtip ku ja
Jesús yja' tɔ tku'oogidi. Nigyumaap
njawi ku jade'en n'ijxy. ⁷Xjats ja
ankilis xnimaay:

—¿Tiku nigyumaap xjawí? Ixyam
n'uktuknijawit sudso'ampy idø'øn

yø jade'en tijy yø tɔ'øxyøjk jɔts
yø ka'øy jiyujk midi ja tɔ'øxyøjk
tyatsinaapy, midi wixujk ja
kyubajk jɔts majk ja wyaj. ⁸Yø
ka'øy jiyujk midi ixyam m'ijpxy,
jegyip yø jaayi y'ijty. Ka'ap yø
ixyam ma y'ukyik'ejxni; øy
jade'en tɔ yjaty, pidsømgojmip
jap ayodaajkjøtpy jɔts ñøjkxt ma
wyindigø'oty xemikøjxp. Jɔts ja
jaa'y pøn ja xyøøw kayikja'ay jap
nøkyjøtpy ma jap y'lity ja jaa'xyøøw
midi jujky'ajttip xemikøjxp,
yø'øts nigyumaap tjawidip ku ja
t'ejxkojmidit ja ka'øy jiyujk ku ja
nay jaa yjuky'aty.

⁹Ukmadow yikxon midi
ndukmadowampy: Yide'en yø
wixujkpi kubajk twandijy yø
wixujkpi kojpk ma yø tɔ'øxyøjk
chøøni. ¹⁰Nayide'en yø wixujkpi
kubajk twandijy ñiwixujk ja
windsøndøjkti. Tø wyindigøy
nimagoxk, jɔts nidu'uk ixyam
wyindsøn'aty, jɔts jadu'uk ka'aním
ja myiñ. Kuts ja mye'ent, ka'ap ja
jegy y'ett. ¹¹Jɔts ja ka'øy jiyujk
midi ya ejt naxwiiñ jɔts ka' ixyam
ma y'uk'ejtni, ja' idø'øn etp
myiduktujkpi windsøn. Ja' idø'øn
ndejint yjapatpy ja ñiwixujkpi
windsøn pøn øy sã tɔ yikajpxpaaty,
jɔts jade'eñi ja kyudigø'øyin ñaxt.

¹²Ja majkpi waj midi tɔ
x'ixy, ja' wyandijpy nimajk ja
windsøndi, ka'aním ixyam ja
kutujk yiktanipøkti; pyøktipts ja
kyutujk jɔts tu'uk hori ja'ayi møøt
wyindsøn'attit ja ka'øy jiyujk.
¹³Tu'ugyi ja wyinmaa'ñ tyik'etti yø
nimajkpi windsøndi jɔts tmo'odit ja
myøk'ajtin ja ka'øy jiyujk. ¹⁴Xjats
møøt cheptu'undit ja Borreek U'nk,

mimajada'akidipts ja' ja'agøjxp ku møk ja myøk'ajtin tjagyepy; nipøn ya naxwiiñ kyajade'eni, pøn ja mөөtti kø'øm ja Dios Teety ja tø wyi'ijxyidi jøts ja tø yajxyidi, myiduda'aky'ajttip ja'.

¹⁵Jøts ja ankilis nayide'en xnimaay:

—Yø mejy midì tø x'ixy ma yø tø'øxyøjk chөөni, yø' wyandijpy niduki'iyi naxwii'ñit kajp. ¹⁶Jøts ja nimajkpi windsøndøjkti midì wyandijpy ja ka'øy jiyujk wyaj, ja'ats kyadami'ejxiwyampy ja ka'ødyø'øxy jøts tyiktuu'duktit; jøts jade'eñi tyikwindigø'ødyit jønjøtpy. ¹⁷Tundi jade'en sam ja Dios kø'øm tø mwinmaa'nmyø'øyidi sam ja kø'øm ttsøky, paty tkajpxmuktit ja windsøndøjkt jøts ja kyutujk tmo'ot ja ka'øy jiyujk kunim yø ttu'undit jade'en sam ja Dios tø ttanibiktaagi. ¹⁸Yø ka'ødyø'øxy pøn tø x'ixy, jade'en yø' sam yø møj kajp Babilonia midì niduki'iyi ja naxwii'ñit ja windsøndøjkt y'ane'empy.

Ku ja møj kajp Babilonia wyindigø

18 Xjats ku jade'en yjajty winets n'ijxy tu'uk ja ankilis ku ja tsajpjøtpy kyidaajky, møk ja kyutujk tmimiiñ jøts ja naxwii'ñit tyikjajtaajky ku ja møk tyii'kxy chamamy. ²Xjats ja ankilis møk kyajpxy jøts wya'añ:

—Tø ja møj kajp Babilonia wyindigøy. Miku' tsinaadyaajk tø wyimbejtni jøts tum ja ka'øy jiyujk jam tsinaadyip. ³Ja'agøjxp jade'en yjajty ku ja naxwii'ñit jaa'y tø ttukpaduñ ja kya'øy'ajtin. Tø ja windsøndøjkt mөөt y'øyjaa'y'aty

kya'øyjaa'y'aty. Pønts atstooktip atsyaktip tø ja ttamøktøjkiñidi ku ja ttookti midì yiktundip ja pøktyumbi.

⁴Xjats ø nmadøøy jadu'uk ja ayuujk midì tso'omp tsajpjøtpy, xjats wya'añ:

—Pidsømdi meets jam kajpjøtp pøn jaty ø nja'ajtpy. Kidi nugo ja pøky xpaatti jøts kidi nayide'en ja ayo'on nugo xpaatti. ⁵Tø yø jade'embi kajp ja pyøky ñipajtni, xjats ja Dios ka' tja'dyigøy ku jade'en kya'øyjaa'y'atti. ⁶Wan yø tjaty nayide'en sam yø tø tka'ødyuñ ja naxwii'ñit jaa'y. Wan jawaani møj tkubety ja kya'øy'ajtin. ⁷Pø øyxi ñamyikejxyi, møj ñayjawi, wants t'ixy tnijawi nayide'en ja ayo'on. Wampts ja' y'am yjotp: “Windsøn'ajtpyim øts ixyam; ka'ap ø nmay ndajy sam ja ku'øktyø'øxyin, ka'ap ø sa njatt.” ⁸Ja'agøjxp tuktoñi nøjkx ñaxkida'aky mayjøøjp ja ayo'on: ja o'jkin, ja yuu, ja pa'am, jøts nayide'en nøjkx tuki'iyi tyøøyjø'køxti; ja Dios janch møj ku ja ayo'on jade'en myo'ojidit.

⁹Jøts ja naxwii'ñit windsøndøjkti tpayax'axtit tpajø'ødit ja kajp ma ja tø pyøktyundi, ku t'ejxtit ku ja tø yjønmajsniyi, jøts ja jok nugo pyidø'kni. ¹⁰Jagam ja tsø'øgi y'a'ejxuktit, ja ku ja nayide'en yjattit, jøts yide'en wya'andit:

—iMjanch'ayøøy meets Babilonia! Janch møk ja møk'ajtin y'ity xmөөt'atti. Pø tøxi tuktoñi mwindigøy.

¹¹Nayide'en ja too'kpi ajuubyitøjk, pyaya'axtip ja', ja'agøjxp ku ka' pøn jade'en y'ukjuuñit sam y'ijtyin, ja tyøøky myimaadyip myidajtip ti

jaty ja myøøt'ajttip: ¹²jap oori, jap plati, jap n'ijxyim nga'ijxyim, jap ja øybi wet, tsuu'nk jøts tsajpts; jap nayide'en mayjøøjp ja kipy midi pa'akxukp, jap tsaadsech tsaagueegidi, jap bronze jøts ja nugo pujx, ¹³japts nayide'en ja kanela, to'kx tsøøy, poom, mirra, jøts ja pa'akxukpi, jap ja vino, aceite, y'øybi ariin way jøts ja ariinbajk; jap nayide'en ja jiyujk midi tsimchømp, jap ja borreegi, jap ja kawaay jøts ja karreti. Nay jap ja tumbi jaa'y tyøøgyi pøn tundip sam ja jiyujkin. ¹⁴Xjats ja too'kpitøjk wya'andit:

—Tø wyindigøøgyixy tuki'iyi midi y'ijty mdsojktip; tø tyigøøgyixy ja mgumeeñ'ajtin ja mjujky'ajtin, nijuuni jadigojk kya'ukyikpatnit.

¹⁵Jøts ja too'kpitøjk, tsø'jkidip ja', jøts jagam y'a'ejxuktit ku nayide'en y'ayo'ombaattit, pyaya'axtip pyajø'dip ja', ¹⁶jøts wya'andit:

—iMjanch ayøøy meets Babilonia kajp! Janch tsuj meets mgajp y'ijty sam tu'uk ja tø'øxyøjk tsuj ñaxyøxyin, ku øybi wet tpikta'aky wan tsuu'ngi wan tsajpts, kuts o midi'ibi xox tpikta'aky wan ja oori jøts ja tsaadø'kxpi. ¹⁷iPø tøxi tuktoñi kyugøxi ja mgumeeñ'ajtin ja mjujky'ajtin!

Jøts nayide'en pøn jaty jam tundip barki jotp, jagamyi ja tyandøø. ¹⁸Jøts t'ejxpaattøø ja jok ku tø tyøøbyøjkni ja kajp, jøts møk wyandøø:

—iNima jade'en ja kajp ejxim ya'at tø y'lityin!

¹⁹O sa yja'adø'tsnidi o sa ñadyu'uniyidi, ja' møk yja'widip

ku ja kajp jade'en yjaty, chap'aawdi, jøts wya'andi:

—iMjanch'ayøøy mee Babilonia kajp! iJa mgumeeñ'ajtin ja mjujky'ajtin øø tø ndamajada'aky pøn jaty ja barki tmøøt'ajttip yam mejyjøøjtjy, jøts jotmøñ tø mdyimgyudigøødyi!

²⁰Taxonda'akti meets pøn jap tsajpjøtpy, meets kugajpxtyøjk, meets janchja'wibitøjk, pø tøxi ja wyindigøøy ja ka'øgyajp jøts jade'en ja Dios tø tpayø'øy ku tø myika'ødyundi.

²¹Xjats tu'uk ja møj ankilis tkiyjji'iky tu'uk ja amuum møj paandsaa jøts ja mejyotp tkuwibejpiyii'ñ, jøts ja wya'añ:

—Jade'en yø Babilonia kajp wyindigøøy ejxim yø tsaayikuwibejpi mejyotp, jøts nijuuni xøøw kya'ukyik'ejxnit. ²²Nima jadigojk ti kya'ukyikmadooni kajpjøøjtjy ja xuxpi ja kowbi; nima pøn ti tka'uktunidi, nima pøn kya'ukjøjtsnidi. ²³Niti jaj niti tøø'kx kya'ukaxø'kni jøts niti jade'en kya'ukyikmadooni sam ti y'lityin xyødundi. Tø yø kajp wyindigøøy, øy ja too'kpi yajkpidi tø tjamøøt'attit møj, øy tuki'iyi ja naxwii'ñit kajp tø tjawin'øø'nguixy møøtpi ja kya'øy'ajtin.

²⁴Ja'agøjxp yø kajp jade'en tø yjaty ku jam tø tyik'ookti ja Dios kyugajpxy jøts ja Dios yjanchja'wibitøjk. May ja jaa'y tø tyik'ookti o magajp.

19 Kuts jade'en yjaty jøts nmadøøy ku mayjaa'y kyajpxti jap tsajpjøtpy jøts møk wya'andi:

iTu'ugyi adøm nDios Teety
 janch møj janch øy! Ja'ats
 tu'ugyi xyiknitso'ok'ajtindip.
² Tiy'ajtingøjxp ja Dios ttiidyuñ;
 t'ayo'onmøøy ja ka'ødyø'øxy,
 ja'agøjxp
 ku ja naxwii'ñit jaa'y
 tø tyikma'aty ja'
 kya'øy'ajtingøjxp;
 paty ja Dios ja tpayø'øy ku
 jade'en tø tyik'ookti ja
 yjanchja'wibitøjk.

³ Xjats jadigojk wyangojmidi:
 —iJanch møj ja Dios! Nijuuni yø
 kajp kyatøøy'amø'øty, jok'ejtp yø'.

⁴ Xjats ja ñi'ee'pxmaktaxkpi
 møjaa'dyøjk jøts ja nimaktaxkpi
 jiyujk ñagyuxendyaajkidi jam Dios
 myøjtsinaadyaajk wingujkp, Dios
 tja'myatsti jøts wya'andi:

—iJade'en, ku Dios janch møj!

⁵ Jøts yikmadøøy ja kajpxy ja
 ayuujk ma ja møj tsinaabyajt jam,
 midi wamp yide'en:

Winjawidi kunuu'kxyjawidi
 meets ja Dios,
 pøn tpadundip pøn twindsø'jkidip
 wan tmøjidi wan tmutskidi.

Ku ja Borreek U'nk yikxødu'unt

⁶ Xjats nmadøøy nayide'en ejxim
 ja mayjaa'y kyajpxyin, sam ja møj
 nøø øø'tspin wyina'añ jøts ja tsaach
 møk anaaw, jøts wya'añ yide'en:

iJanch møj ja Dios! Tø
 ñaxkida'aky ja kyutujk jøts
 jade'en xniwindsøn'ajtindit.

⁷⁻⁸ Wan t'øy'ajtyim wan
 txondaajkyim, wan
 twinja'wa'am wan
 twindsø'jka'am.

Tøxi tpaaty ja yja' midi
 yikejtp Borreek U'nk

jøts tmøøtsinaawya'añ
 tmøø'tetwa'añ ja
 yjanchja'wibitøjk pøn
 øy'ajttip wa'ats jaa'y'ajttip.
 Jade'en idø'on yø tijy sam
 ja jaa'y ja xøøw ttundi ku
 y'amajtskidi.

⁹ Xjats ja ankilis xnimaay:
 —Ja' jade'en: “Tya'øy'ajttip pøn tø
 yikway ma ja Borreek U'nk xyøduñ.”
 Jøts ja yjaakwa'añ:
 —Yø' ayuujk midi tø xjaadyañ, tiy
 janch yø', Dios tyiy'ajtin yø'.

¹⁰ Xjats ø nagyuxendyaajki ankilis
 wyingukp jøts nwindsø'øgiwya'añ,
 jøts ø xnimaay:

—Ka'ap jade'en m'adø'øtst;
 pø tu'ugyixi ja Dios Teety
 yikwindsø'øgi. Nayide'enxi øts
 ja nwindsøn'ajtim Jesús yja'
 nbaduujni sam metsin, sats ja
 mmijanchja'wibitøjkindi. Ja Jesús
 kyajpxy y'ayuujk nbagajpxa'amp
 pøn jaty ja Dios ja'ajtyiyip.

**Ja jaa'y pøn ttatsinaapy
 ja poop kawaay**

¹¹ Xjats ø n'ejxpaaty ja tsajp
 y'awaajch; jamts kyaxi!'jky tu'uk ja
 poop kawaay, ja'ats ja ttatsinaapy
 pøn øy pøn tiy'ajtin møøt, jøts
 tpayø'øwya'añ ttiidyunwa'añ ja
 naxwii'ñit jaa'y. ¹² Janch tøø'kxp
 ja wyeen ejxim ja jønyowin,
 jøts kyubajkjxp may ja koroni
 tmøø'taty. Jamts ja xyøøw yja'ayi
 wyimbojkwemp, øy ja pøn tja'ijxy
 ka'ap ja pøn t'ejxkapy, ja' kø'øm
 tnija'wip. ¹³ Amuum ni'jpy ja wyet
 midi wyet'ajtpy, jøts ja xyøøw,
 Dios kyajpxy ja' Dios y'ayuujk ja'.
¹⁴ May ja myøøtseptumbi pyayø'øyi
 pøn tso'ondip jap tsajpjøtpy.

Amuum poop, øybi wet, wa'ats wet wyet'ajttip jøts tum poop kawaagyøxpti. ¹⁵Japts y'aawjøtpy pyidsimy tu'uk yøñchujx, janch jøøjp ja', ja'ats tyayiktsaachip ja naxwii'ñit jaa'y ku ja møk tniwindsøn'atwa'añ ja naajx ja kajp; møk ja ayo'on ja payø'øyin tyiknaxwa'añ ku ja Dios Teety tø yjanchjot'ambiky. ¹⁶Yjixki'py ja xyøøw yja'ayi jøts pyuugyixy. Jade'en ja twandijy ku møk ja kutujk tmøøt'aty, nipøn ya naxwiiñ kyajade'eni.

¹⁷Winets ø n'ijxy tu'uk ja ankilis jam xøøw wyindump, jøts tmigajpxy ja jiyujk mididi kajkwidjettip tsajpwemp, jøts wya'añ yide'en:

—Mendi namyukidi jøts xka'adyit x'a'uxidit ja Dios yja', ¹⁸jøts xtsu'utstit xjøø'kxtit ja windsøndøjk ja soldaditøjk. Nayide'en xtsu'utstit ja kawaay jøts pøn ja tatsinaajyip. Niduki'iyi xjøø'kxtit pøn ja jaa'y yiktuujnip jøts pøn midundip, wan tmøji wan tmutski.

¹⁹Xjats ø n'ijxy ja møj ka'øy jiyujk jøts ja windsøndøjk pøn ya naxwiiñ møøt ja syoldaditøjk, ja'agøjxp tø ñamyukyidi ku cheptunwa'andi møøt ja' pøn ttatsinaapy ja poop kawaay. ²⁰Jøts ja ka'øy jiyujk yiktsuumy møøt ja' pøn nugo win'øø'ndip ñadyijyi ku Dios ja tkajpxnaxpi'aty. Jade'en ñadyijyi tñanky'ejxi ja myilagri'ajtin jøts jade'en ja jaa'y twin'ii'ñ jøts yikmo'odit ja møj ka'øy jiyujk y'ejxa'anin jøts jade'en twindsø'øgidit ja y'awanax. Xjats ja møj ka'øy jiyujk møøt ja' mididi nugo win'øø'mp yikuwibejpidyidi mejyotp,

ma yjanchtøøy yjanča'ay ja nøø.

²¹Ja'ats ja tya'ookøxti ja myigu'uk mididi ja yøñchujx tmøøt'ajtp y'aawjøtpy, jøts ja jiyujk ja yjø'kxkøxyidi mididi kajkwidjettip.

Sa ja kutujk mididi tukmil jumøjt etp

20 Xjats ø n'ijxy tu'uk ja ankilis mididi tso'omp tsajpjøtpy, jøts ja tkøñ'ity ja ñi'awaajts ja ayodaajk jøts nayide'en tu'uk ja møj pujkadeen. ²Myajts ja ankilis ja møj ka'øchaa'ñ mididi yiktejp møj mikul' ja Satanás, jøts yikøxøjch, yikpaxxøjch jøts tukmil jumøjt y'ett ³y'ayo'ot ma yikuwibejpiyi'ñ ayodaajkjøtpy. Jap ñi'adujkpejty jøts ja seeyi yikpiktaajky ja agaj, jade'engøjxp jøts ka'ap ja naxwii'ñit jaa'y nugo ajawi t'ukwin'øø'nit. Tukmil jumøjt y'ayo'ot, winets yikmajtstu'utt øy winø'ønin.

⁴Winets ø n'ijxy ja møj windsøndøjk chøønidi jam møj tsinaabyajtkøjxp. Tø yikmo'odi ja kutujk ja møk'ajtin jøts tiidyu'unin ttu'undit. Nayide'en ja yik'ijxy ja anmija'windi pøn ja kyubajk tø wyinakti, ku ja tkajpxwa'kxti ja nwindsøn'ajtim Jesús yja'. Jade'ents ja Dios yja' tø tpaduujnidi. Ka'ap ja twindsø'øgidi twinjawidi ja møj ka'øy jiyujk jøts nika'ap ja y'ejxa'anin yikpikta'akti wyimbojkøjxp jøts kyøjø'øm. Yik'ijxy ku ja yjujkyøxøxti jøts tukmil jumøjt møøt wyindsøn'attit ja Cristo. ⁵Yø'øts jawyeen jujkyøxtøø, pønts jaaktandøø jaanimts ja yjujkyøxtit kunim ja tukmil jumøjt ñaxt. ⁶Tya'øy'ajtip tyaxondaajkip ja Dios yja' pøn

jawyeen jade'en jukpyøktøø.
Ja'ats ja Dios ja'ajtidip jøts ka'ap
ja y'ayo'odit ku ja myimajtskpi
o'jkin ñaxt. Pyadundip ja Dios yja'
jøts møøt wyindsøn'attit ja Cristo
tukmil jumøjt.

⁷Ku wyinaty tø kya'pxy tukmil
jumøjt winets yikmajtstu'utt
ja Satanás. ⁸Ku pyidsø'omt,
wyin'øø'mp ja' ja ñaxwii'ñit
jaa'y. Nøjkx twin'iiñ nayide'en ja
kajp ma yiktijy Gog jøts Magog,
jøts ñamyukidit ja tseptumbi
niduki'iyi ja syoldadi. Janch
namay ja'adi, ka'ap ja myachooni.
⁹Namyukidøø jam møj jøgyøjxp
jøts tñawidejtkøxti ma jam y'etti
pøn jaty ja Dios ja'ajtidip, pøn
ja chøjkpy. Xjats ja Dios ja jøøn
tnajtskajxiyi'ñ jap tsajpjøtpy jøts
niduki'iyi tyøøgyijxy. ¹⁰Xjats
ja miku' nayide'en yikmaajch
ja'agøjxp ku ja jaa'y nugo twin'iiñ.
Nay jam yikpiktaajky mejyjtøp
ma yjanchtøø yjancha'ay ja nøø.
Møøt ja' ja møj ka'ø y jiyujk, jøts
ja' midi nadyejip kugajpxy pøn
nugo twin'øø'mp ja ñaxwii'ñit jaa'y.
Jamts y'ayo'odit xemikøjxp xinaxy
tsunaxy.

**Ku ja Dios ttiidyu'unt ja jaa'y
ma ja pyoop tsinaabyajt jam**

¹¹Jøts ø n'ijxy tu'uk ja møj
tsinaabyajt, poop ja', jam ja Dios
chøøni. Xjats ja tsajp, xjats ja ñaajx
tuki'iyi wyindigøøgyijxy Dios
wyingujkp, nima niti kya'uk'ejtni.
¹²Jøts ø n'ijxy ja jaa'y, Dios
wyingujkp tyanidi pøn tø y'ookti,
ja møj ja mutsk ja'adi. Jamts ja
nøky yik'ijxy sa tø yjaa'y'atti
nidu'uk nidu'uk. Nayide'ents ja

nøky jam yik'ejxmi ma ja xyøøw
jap yjaabyetyidi pøn jaty ja Dios
yja' tø tpaduujni, xjats jade'en
niduki'iyi yikpayø'odyi. ¹³Jam
ja'adi pøn tø y'ookti mejyjtøpy jøts
nayide'en pøn tø y'ookti ñaxkijxy.
Jamts ja yikpayø'odyi tu'uk tu'uk
pøni sa tø yjaa'y'atti. ¹⁴Winets ja
Dios tyikjøpkixy ja o'jkin tigø'øyin
jøts ka' pøn y'uk'looknit jadigojk.
Ja' tøødyip pøn tø tyundigøydi
jap mejyjtøpy ma yjanchtøø y
yjancha'ay ja nøø. ¹⁵Ja' jade'en
yikpiktaktip jam, pøn ja xyøøw
jap ka'ejttip nøkyjtøpy, pøn
tkabadundip ja Dios yja'.

**Ku ja tsajp ja ñaajx jadigojk
y'øyiyi'ñ jemy**

21 Nay winets ø n'ijxy ja
jemchajp ja jemñaajx
jadigojk; pø tøxi ja tsajp ja ñaajx
wyindigø y midi jawyeen ejt.
Nayide'ents ja mejy kya'uk'ejtnaa.
²Xjats ø n'ijxy tu'uk ja jemgyajp
kyida'aky tsajpjøtpy, kunuu'kxy
Jerusalén xyøøw'ajtpy, Dios
wyingujkp ja chøøñ. Janch
tsuj janch xøxy ja kajp, jade'en
ja kyaxi'iky ejxim ja jaa'y
pyøkwa'añin. ³Winets nmadøø y
møk kyajpxy jap tsajpjøtpy, xjats
wya'añ:

—Ejx sa ja Dios tmøøtsinaawya'añ
ja ñaxwii'ñit jaa'y. Ja' amuum
ja'ajtidip jøts ja ja' xemikøjxp
tmøøt'ett. ⁴Yiktigø'øpy ja yjotmaydi
ja yjotmay'o'jkindi. Ka'ap ja o'jkin
y'uk'ejtnit y'ukpaajtniyit, ka'ap
ja jajyi tøøyi t'uk'ejxnit; sam tø
y'uk'ityin, tø ja ñaxy.

⁵Xjats ja wyaañ pøn jam tsinaapy
møj tsinaabyajtkøjxp:

—Uk'ejxim sa ɔts tuki'iyi jemy nyik'oyigyɔxt.

Xjats jade'en wyangojmi:

—Jaabyat ya'at ayuujk ja'agɔjxp ku tyiyi yjanchi, ka' ma ndagudsɔ'jka'ant.

⁶Winets ɔts xnimaagyojmi jɔts yide'en wya'lañ:

—Tɔ y'oyigyixy. ɔts idɔ'ɔn nyiktso'ondaajk tuki'iyi jɔts nayide'en nyikjɔpkɔxt. Pɔni pɔn tɔɔjtsip, ɔts ja nɔɔ ja nmo'op midi yikjuky'ajtp xemikɔjxp, jɔts may'ajt ja'. ⁷Pɔni pɔn tmimajadaajkip ja miku' yja', ja'ats nmo'op ja ɔy'ajtin; jade'ents ɔts ja n'u'nk'att jɔts nmɔɔt'ett xemikɔjxp. ⁸Pɔn tkawamp ɔts nja', pɔn tkamibɔjkip, pɔn xkatsojkip ɔts nja', pɔn yikjaa'y'o'kp, pɔn ka'oyjaa'y'ajtp, pɔn ja miku' yja' tyiktuujnip, pɔn twindsɔ'jkip ja maxandsaa, pɔn taay'ajttip, ja' nɔjkkxkɔxtip xemikɔjxp jam mejyotp ma yjanchtɔɔy yjancha'ay ja nɔɔ.

Tsuj kyaxi'iky ja jemgyajp Jerusalén

⁹Winets tu'uk myiñ ja ñiwixujkpi ankilis midi ojts tyikmiñ ja wixujkpi ayo'on ya naxwiñ, jɔts ɔ xnimaay:

—Men, jɔts ɔ nduk'ext ja janchja'wibitɔjk pɔn mɔɔt y'ettit ja Borreek U'nk.

¹⁰Nayi kumaa'yjɔtpy ja Espiritu Santo xuk'ijxy, ku ɔts ja ankilis jam mɔj kojpkɔjxp xyiknijxxy, jɔts ɔ xuk'ijxy ja kunuu'kxy jemgyajp, ja Jerusalén midi kidakp tsajpjɔtpy jam Dios wyingujkp. ¹¹Janch tsuj janch tɔɔ'kxp ja kajp sam ja Dios chinaadyaajkin, jade'en chamamy ejxim ja wa'ats tsaadɔɔ'kxpa'an,

tajajna xp jade'en sam ja wa'ats keega'an. ¹²Kɔjxp nabojs'tawidity

ja kajp jɔts makmajtsk ja agaj tjagyepy, jamts ja ankilis tyanidi ma jaty ja agaj. Jam agajkɔjxp kyɔxja'ayidi ja xyɔɔw pɔn ja Israelit jaa'y y'aadsip kyugojip, namakmajtsk idɔ'ɔn ja'adi jɔts tu'uk tu'uk ja agaj ja xyɔɔw tmɔɔt'ajtti. ¹³Tigɔɔk ja agaj tyañ aga'ñ tso'ampy, jɔts ja jadigɔɔkpi agaj tyañ anajy tso'ampy. Xjats ja jadigɔɔk agaj tyanmi windujy tso'ampy, nayide'en jadigɔɔk agaj tyañ jixkɔ'om tso'ampy.

¹⁴Makmajtsk ja tsaa yiktaɔjtsɔɔ'ñ ja pɔch, jɔts tu'uk jaty ja tmɔɔt'aty ja xyɔɔw pɔn jaty ja Jesús kyudanaabyi'ajtpy.

¹⁵Ja ankilis midi ɔ xmiimadyakp jam ja takejpx ja tmɔɔdi, tum oori, xjats ttakijpxy winɔ'ɔnin ñabojs'tawidityi ja kajp, jɔts nayide'en winɔ'ɔnin myɔji ja agaj.

¹⁶Kwadradi ja kajp, ni sudso'ampy kyayɔñi kyakoni. Majtsk mil ja majtsk magɔ'pxy kilometri tuktamajñ jaty, jɔts nayide'en kyɔxpi. ¹⁷Winets nayide'en tkijpxy ja pɔch, tugui'pxy myaktaxk metri ja myajpx'ajtin tjagyepy. Jade'en ja ankilis tkijpxy sam adɔm nguipxyin.

¹⁸Amuum jaspe tsaa tɔ tɔapɔch, jɔts ja kajp amuum oori ja', jɔts wa'ats keegi kyaxi'iky. ¹⁹Ma ja makmajtskpi tsaa tɔ yiktaɔjtsɔɔ'ñ, mayjɔɔjip ja ɔybi tsaa'u'nk tɔ yiktaxɔxy. Ja myidu'ukpi tsaa tmɔɔt'aty ja jaspe, jɔts ja myimajtskpi tsaa tmɔɔt'aty ja zafiro. Ja myidigɔɔkpi tmɔɔt'aty ja ágata, jɔts ja myimaktaxkpi

tmøøt'aty ja esmeralda. ²⁰ Ja myimagoxkpi tsaa txox'aty ja ónice, jòts ja myidudujkpi tsaa txox'aty ja cornalina. Ja myiwixujkpi tsaa txox'aty ja crisólito jòts ja myiduktujkpi txox'aty ja berilo. Ja myidaxujkpi tsaa txox'aty ja topacio jòts ja myimajkpi tsaa txox'aty ja crisoprasa. Ja myimaktu'ukpi tsaa txox'aty ja jacinto jòts ja myimakmajtskpi txox'aty ja amatista. ²¹ Tum perla ja makmajtskpi agaj, jòts amuum oori ja møj tuu' midi najxp kajpjotp, jajp tsamamp ja'.

²² Ka'ap ja tsaptøjx jam yik'ijxy jemgyajpjotp. Ka'ap ja chøkyi, kumi amuum ja Dios ja tkajp'aty møøt ja Borreek U'nk. ²³ Ka'ap ja chøkyi jòts ja xøøw ja po' jam y'a'nt kajpjotp. Kø'øm ja Dios Teety jòts ja Borreek U'nk ja y'aju'uk ja y'ajaj tyikjajt tyiktøø'kxt. ²⁴ Nay ja' tkudøø'kxidip tkujajidip ja naxwii'ñit jaa'y pøn tø ñitso'ok'atti, jòts nayide'en ja windsøndøjkti pøn ja y'øy'ajtin jam tø tminøjkxti. ²⁵ Awa'ats jam y'ity ma ja pøch agaj jam. Nijuuni jam kyakoodsi, xiiñ jam y'ity. ²⁶ Xjats jam tminøjkxti ja naxwii'ñit jaa'y ja y'øy'ajtin ja wya'ats'ajtin; ²⁷ ka'ap jam tyøkit pøn ka'øy'ajtip, pøn ja myigu'uk nugo twin'øø'mp twindaay'ajtp jòts o ti tkadami'ejxiwya'añ. Ja'ayi jam tøjkidip pøn ja xyøøw jap jaabyety jap nøkyjøtpy, ma jap y'ity ja jaa'y ja xyøøw pøn jujky'ajttip xemikøjxp. Ja'abi nøky tmøøt'ajtp ja Borreek U'nk.

22 Xjats ø xuk'ijxy ja ankilis tu'uk ja møj nøø. Midi yik'ukp janch wa'ats ja', ja'ats

xyikjujky'ajtim xemikøjxp. Janch ti'lky ja', jøts ja jam pyidsimy ma ja Dios Teety chøøni møøt ja Borreek U'nk. ² Jamts ja møj tuu' kujk'am yø'øy ja nøø. Adsow aduuk ja kipy jam yøn nøøba'am. Ja' tyøøm yiktajujky'ajtp xemikøjxp. Wimbo' wimbo' ja tyøøm'aty jòts ja y'aay tsøøy'aty ja naxwii'ñit jaa'y. ³ Pøn jap tsinaadyip ka' pøn y'ukjemñimaa'yniyi y'uktenimaa'yniyi. Ja Dios Teety jam tu'ugyi ejtp møøt ja Borreek U'nk, ja'ats windsø'jkijidip ja yjanchja'wibitøjx. ⁴ Ejxiyidip nijawiyidip wemp'am ja Dios Teety, jòts nay ja xyøøw myøøt'ajtidip wyimbojkwemp. ⁵ Ka'ap ja koots'ajtin jam y'uk'ejtnit; ka'ap ja jaj ka'ap ja xøøw t'ukyiktunit; Dios Teety tkujajip tkudøø'kxip, ja'ats jam windsøn'attip xemikøjxp.

Wingomp ja' ku ja Jesucristo mye'ent

⁶ Winets ja ankilis xnimaay yide'en:

—Tiy janch ya'at ayuujk midi ixyam tø xjaadyañ, ka' nugo xkudsø'øgit. Nay ja Dios Teety pøn y'ijty tyukajpxwa'kxpy ja kyugajpxy, tøts ja nayide'en tkejxy ja y'ankilis jòts ttukmado'ot ja pyadumbi pyabøjkip sa tsojk yjatwa'añ kyubatwa'añ.

⁷ Nøøm ja nwindson'ajtim:

—iMe'emp øts tsojk! iTya'øy'ajttip tyajotkujk'ajttip pøn ja Dios kyajpxy tmøjpkitaajkip sa yap nøkyjøtpy yjaabyety!

⁸ Xjats øts nmadøøy n'ijxy kø'øm sa øts ya'at nøkyjøtpy tø njaadyañ. Winets øts ja ankilis wyingujky nagyuxendyaajki sam øts ja xuk'ijxy

jòts òts ja nwindso'ògit. ⁹ Jòts òts ja xnimaay:

—Ka'ap jade'en m'adò'òtst; pò tu'ugyixi ja Dios Teety yikwindsò'ògi. Nayide'enxi òts ja nwindso'n'ajtim Jesús yja' nbaduujni sam metsin, sats ja mijanchja'wibitòjkindi, jòts niduki'iyi pòn jaty tmòjpiktakp midi yap nòkyjòtpy jaadyañ.

¹⁰ Jòts nayide'en ja ankilis xnimaay:

—Ka' nugo x'amaatsk'att ja Dios kyajpxy midi yap nòkyjòtpy jaadyañ. Wingompxi jòts yjatt kyubatt jade'en. ¹¹ Wan jade'en tjaa'y'atti pòn ka'òy'ajttip, jòts pòn ja Dios yja' tpaduujnip, wañim ja tyikyò'òdyi jade'en ja yjaa'y'ajtin.

¹² Yide'lents ja nwindso'n'ajtim wya'añ:

—Tsojk ø nme'ent jòts ø nmime'ent ja øy'ajtin. Ja'ats ndamay'atp nidu'uk nidu'uk sa tò yjaa'y'atti.

¹³ Òts idò'on nyiktso'ondaajk tuki'iyi jòts nayide'en nyikjòpkòxt.

¹⁴ Tya'òy'ajttip tyajotkujk'ajttip pòn tò ñitso'ok'aty. Awa'ats ja tyuu'di jòts ja tyòkidit jam kunuu'kxy kajpjotp. Jamts tpaattit ja kipy midi jam yiktajujky'ajtp xemikòjxp. ¹⁵ Ka'ap jam tyòkidit pòn ka'òyjaa'y'ajttip pòn ja miku' yja' tpaduujnidip, pòn maa'tstip, yikjaa'y'oo'ktip, jòts pòn ja myigu'uk nugo twin'òò'mp.

¹⁶ —Tò òts ja n'ankilis nguexy jòts tuki'iyi yiknigajpxkòxt ya'at Dios kyajpxy, jòts jade'en yiknijawit

pòn jaty ja Dios ja'ajtidip jam niwixujkpi kajp. Òts ndeety'ap'ajtpy ja mòj windsòn David. Jade'en òts ja naxwii'ñit jaa'y nyikujajtaagi sam ja mòj jaxyòow midi jòpyidsòmp.

¹⁷ Xjats ja Espíritu Santo jòts ja nwindso'n'ajtim yjanchja'wibitòjk wya'andi jòts ø nwindso'n'ajtim yiknòjmi:

—iMen!

Pòn jaty tmadoop yò'òbi ayuujk wan nayide'en twa'andi:

—iMen!

Jòts pòn ttsojpk ja øy'ajtin ja xondaajkin wan tmiñ jòts tpaatt ja may'ajt.

¹⁸ Ixyam ø nnigajpxy pòn jaty yam tmadoop ja Dios kyajpxy sam yap nòkyjòtpy yjaabyetyi: Pòni pòn nugo tyiktigajtsp ya'at ayuujk jòts ne'egi tiy tijy midi ka' tyiy'ajtin, Diosts ja ayo'on mò'ojip sam yap nòkyjòtpy yja'ayi. ¹⁹ Pòni pòn yò Dios y'ayuujk tyiktigajtsip jòts ka'pxy tka'ukajpxnidi sam yap nòkyjòtpy yja'ayi, Diosts ja pòjkiñip ja y'òy'ajtin jòts ka' tyòkidit mā ja kunuu'kxkyajp jam midi yò nòky ñigajpxpy.

²⁰ Xjats ja nwindso'n'ajtim wya'añ pòn ya'at tnigajpxp:

—Tsojk nme'ent.

Jòts ø n'adsojimbijty:

—Øy jade'en. iMen,

nwindso'n'ajtim Jesús!

²¹ Ja nwindso'n'ajtim Jesucristo mgunuu'kxidip meets niduki'iyi. Jade'en idò'on ja y'ejxi tyiyi.